

水經注釋

ル 5
139
9





支那  
所藏

東京  
圖書

凡  
139  
9

水經注釋卷二十四

仁和趙一清誠夫錄

睢水

瓠子水

汶水

睢水出梁郡鄆縣

睢水出陳畱縣西菑蕩渠東北流地理志曰睢水首受

陳畱浚儀菑蕩水也經言出鄆非矣又東逕高陽故亭

北俗謂之陳畱北城非也蘇林曰高陽者陳畱北縣也

按在畱故鄉聚名也有漢廣野君廟碑延熹六年十二

月雍邱令董生何氏曰隸釋作董之乃董督之義一清按斯言未安仰餘徽于千

載遵茂美于絕代命縣人萇照為文用章不朽之德其



略云輟洗分餐咨謀帝猷陳鄭有涿鹿之功海岱無牧  
 野之戰大康華夏綏靖黎物生民以來功盛莫崇今故  
 宇無聞而單碑介立矣陳留風俗傳曰酈氏居于高陽  
 沛公攻陳留縣酈食其有功封高陽侯全氏曰按食其  
 是因其子高有酈峻字文山官至公府掾大將軍商有  
 功食邑于涿故自陳留徙涿縣有餅亭餅鄉建武二年  
 世祖封王常為侯國也一清按王常封山桑侯不聞在  
 陳留也豈由鄉亭進封而史傳  
 失之乎 睢水又東逕雍邱縣故城北縣舊杞國也殷湯周  
 武以封夏后繼禹之嗣楚滅杞秦以為縣圈稱曰縣有  
 五陵之名故以氏縣矣城內有夏后祠昔在二代享祀

不輟秦始皇圍築其表為大城而以縣焉睢水又東水  
 積成湖俗謂之白羊陂陂方四十里右則姦梁陂水注  
 之其水上承陂水東北逕雍邱城北又東分為兩瀆謂  
 之雙溝俱入白羊陂陂水東合洛架水口水上承汜水  
 謂之洛架水東南流入于睢水睢水又東逕襄邑縣故  
 城北又東逕雍邱城北睢水又東逕甯陵縣故城南故  
 葛伯國也王莽改曰康善矣歷鄆縣北二城南北相去  
 五十里故經有出鄆之文城東七里水次有單父令楊  
 彥尚書郎楊禪字文節兄弟二碑漢光和中立也

又東過睢陽縣南



睢水又東逕橫城北春秋左傳昭公二十一年樂大心  
豐愆華恁禦華向于橫杜預曰梁國睢陽縣南有橫亭  
今在睢陽縣西南世謂之光城蓋光橫聲相近習傳之  
非也睢水又逕新城北卽宋之新城亭也春秋左傳文  
公十四年公會宋公陳侯衛侯鄭伯許男曹伯晉趙盾  
盟于新城者也睢水又東逕高鄉亭北又東逕亳城北  
南亳也卽湯所都矣睢水又東逕睢陽縣故城南周武  
王封微子啟于宋以嗣殷後爲宋都也一清按尙書序  
史記周本紀宋  
微子世家皆云周公承成王命  
以封微子于宋注云武王誤也昔宋元君夢江使乘輜  
車被繡衣而謁于元君元君感衛平之言而求之于泉

陽男子余且獻神龜於此矣秦始皇二十三年以爲碭  
郡漢高祖嘗以沛公爲碭郡長天下既定五年爲梁國  
全氏曰閻若璩云睢陽是梁都而班志置之第八其第  
一縣乃碭也按秦立碭郡則碭縣乃秦之治所及漢改  
治睢陽孟堅或仍秦文帝十二年封少子武爲梁王太  
地圖之舊未及改正后之愛子景帝寵弟也是以警衛貂侍飾同天子藏珍  
積寶多擬京師招延豪傑士咸歸之長卿之徒免官來  
游廣睢陽城七十里大治宮觀臺苑屏榭勢竝皇居其  
所經構也役夫流唱必曰睢陽曲創傳由此始也城西  
門卽寇先鼓琴處也先好釣居睢水傍宋景公問道不  
告殺之後十年止此門鼓琴而去宋人家奉事之南



門曰盧門也春秋華氏居盧門以南里叛杜預曰盧門  
 宋城南門也司馬彪郡國志曰睢陽縣有盧門亭城內  
 有高臺甚秀廣巍然介立超焉獨上謂之蠡臺亦曰升  
 臺焉當昔全盛之時故與雲霞競遠矣續述征記曰迴  
 道似蠡故謂之蠡臺非也余按闕子稱宋景公使工人  
 爲弓九年乃成公曰何其遲也對曰臣不復見君矣臣  
 之精盡於弓矣獻弓而歸三日而死景公登虎圈之臺  
 援弓東面而射之矢踰于西霜之山朱氏箋曰藝文類  
聚作孟霜之山  
 集於彭城之東餘勢逸勁猶飲羽于石梁然則蠡臺卽  
 是虎圈臺也蓋宋世牢虎所在矣晉太和中大司馬桓

溫入河命豫州刺史袁真開石門鮮卑堅戍此臺真頓  
 甲堅城之下不果而還蠡臺如西又有一臺俗謂之女  
 郎臺臺之西北城中有涼馬臺臺東有曲池池北列兩  
 釣臺水周六七百步蠡臺直東又有一臺世謂之雀臺  
 也城內東西道北有晉梁王妃王氏陵表並列二碑碑  
 云妃諱粲字女儀東萊曲城人也齊北海府君之孫司  
 空東武景侯之季女咸熙元年嬪于司馬氏泰始二年  
 妃于國太康五年薨營陵于新蒙之朱氏謀璋箋云太  
此下疑有脫誤  
 康九年立碑東卽梁王之吹臺也基陞階礎尙在今建  
 追明寺故宮東卽安梁之舊地也廣周五六百步水列



釣臺池東又有一臺世謂之清冷臺北城憑隅又結一池臺晉灼曰或說平臺在城中東北角亦或言兔園在平臺側如淳曰平臺離宮所在今城東二十里有臺寬廣而不甚極高俗謂之平臺余按漢書梁孝王傳稱王以功親爲大國築東苑方三百里廣睢陽城七十里大治宮室爲複道自宮連屬于平臺三十餘里複道自宮東出楊門之左楊門卽睢陽東門也連屬于平臺則近矣屬之城隅則不能是知平臺不在城中也梁王與鄒枚司馬相如之徒極游于其上故齊隨郡王山居序所謂西園多士平臺盛賓鄒馬之客咸在伐木之歌屢陳

是用追芳昔娛神游千古故亦一時之盛事謝氏賦雪亦曰梁王不悅游于兔園今也歌堂淪宇律管理音孤基塊立無復曩日之望矣城北五六里便得漢太尉橋元墓冢東有廟卽曹氏孟德親酌處操本微素嘗候于元元曰天下將亂能安之者其在君乎操感知己後經元墓祭云操以頑質見納君子士死知己懷此無忘又承約言徂沒之後路有經由不以斗酒隻雞過相沃酌車過三步腹痛勿怨雖臨時戲言非至親篤好胡肯爲此辭哉悽愴致祭以中宿懷冢列數碑一是漢朝羣儒英才哲士感橋氏德行之美乃共刊石立碑以示後世



一碑是故吏司徒博陵崔烈廷尉河南吳整等以為至德在己揚之由人苟不讞述夫何考焉乃共勒嘉石昭明芳烈一碑是隴西枹罕北次陌碭守長隲為左尉漢陽源道趙馮孝高以橋公嘗牧涼州感三綱之義慕將順之節以為公之勳美宜宣舊邦乃樹碑頌以昭令德光和元年主記掾李友字仲僚作碑文碑陰有右鼎文建甯三年拜司空又有中鼎文建甯四年拜司徒又有左鼎文光和元年拜太尉鼎銘文曰故臣門人相與述公之行咨度體則文德銘于三鼎武功勒于征鉞書于碑陰以昭光懿又有鉞文稱是用鑲石假象作茲征鉞

軍鼓陳之于東階亦以昭公之文武之勳焉隸辨曰按後漢書橋

元傳光和六年卒蔡邕集太尉橋公碑有二俱云光和中七年薨水經注謂是碑作于光和中恐誤也其載鼎銘文云文德銘于三鼎云云乃是蔡邕橋公碑中語非鼎銘文也邕有東中西鼎三銘見于集中又有黃戊銘所云鉞文稱是用鑲石假象作茲征鉞亦邕銘中語而謂碑文為李友所作豈後人搜采邕集誤入他人之文耶

耶廟南列二石柱柱東有二石羊羊北有二石虎廟前東北有二石駝駝西北有二石馬皆高大亦不甚雕毀惟廟頽構粗傳遺墉石鼓仍存鉞今不知所在睢水於城之陽積而為逢洪陂陂之西南有陂又東合明水水上承城南大池池周千步南流會睢謂之明水絕睢注渙睢水又東南流歷于竹圃水次綠竹蔭渚菁菁實望



世人言梁王竹園也

太平御覽引水經注曰睢陽有隕石水一名漆溝左傳云隕石于宋

五隕星也故老云此水有時竭涸五石存焉故名隕石水墜處為津今本無之睢水又東逕穀

熟縣故城北睢水又東蘄水出焉睢水又東逕栗縣故

城北地理志曰侯國也王莽曰成富睢水又東逕太邱

縣故城北地理志曰故敬邱也漢武帝元朔三年封魯

恭王子節侯劉政為侯國

朱氏謀瑋箋曰漢書王子侯表魯共王子政封瑕邱地理

志瑕邱屬山陽郡而敬邱即太邱屬沛郡注似誤引也

一清按酈氏所言未可非也地理志山陽郡瑕邱下不

邱侯安知道元所見之本之不作敬邱乎漢明帝更從

今名列仙傳曰仙人文賓邑人賣鞞履為業以正月朔

日會故嫗于鄉亭西社教令服食不老即此處矣睢水

又東逕芒縣故城北漢高帝六年封酈跖為侯國王莽

之傳治也世祖改曰臨睢城西二里水南有豫州從事

皇毓碑殞身州牧陰君之罪時年二十五臨睢長平與

李君二千石承輪氏夏文則高其行而悼其殞州國咨

嗟旌閭表墓昭序令德式示後人城內有臨睢長左馮

翊王君碑善有治功累遷廣漢屬國都尉吏民思德縣

人公府掾陳盛孫郎中倪定與劉伯郎等共立石表政

以刊遠績縣北與碭縣分水有碭山芒碭二縣之閒山

澤深固多懷神智有仙者涓子主柱並隱碭山得道漢

高祖隱之呂后望氣知之即於是處也京房易候曰何



以知賢人隱師曰視四方常有天雲五色具而不雨其  
下賢人隱矣

又東過相縣南屈從城北東流當蕭縣南入于睢

一清按睢水豈

可云入睢乎漢志云睢水東至取慮入泗注云睢水東南  
流入泗謂之睢口經止蕭縣非也所謂得其一而亡其二  
矣獲水經云又東過蕭縣南睢水北流注之此篇經文入  
于睢之睢蓋別水支流所匯而非首受蕩蕩渠之睢道元  
故以出入迴環更相通注調停之

相縣故宋地也秦始皇二十三年以為泗水郡漢高帝

四年改曰沛郡治此漢武帝元狩六年封南越桂林監

居翁為侯國曰相成也

一清按史漢表並作湘成索隱曰在堵陽然則非沛郡之相

王莽更名郡為吾符縣曰吾符亭也睢水東逕石馬亭

亭西有漢故伏波將軍馬援墓睢水又東逕相縣故城

南宋共公之所都也國府園中猶有伯基黃堂基堂夜

被火左右曰夫人少避伯姬曰婦人之義保傅不具夜

不下堂遂遇火而死斯堂即伯姬嬪死處也城西有伯

姬冢昔鄭渾為沛郡太守於蕭相二縣與陂堰民賴其

利刻石頌之號曰鄭陂睢水又左合白溝水水上承梧

桐陂陂側有梧桐山陂水西南流逕相城東而南流注

于睢睢盛則北流入于陂陂溢則西北注于睢出入迴

環更相通注故經有入睢之文睢水又東逕彭城郡之

靈壁東東南流漢書項羽敗漢王于靈壁東即此處也



又云一清按下有脫文東通穀泗服虔曰水名也在沛國相界未詳睢水逕穀熟兩分睢水而為蘄水故二水所在枝分通謂兼稱穀水之名蓋因地變然則穀水即睢水也又云漢軍之敗也睢水為之不流睢水又東南逕竹縣故城南地理志曰王莽之篤亭也李奇曰今竹邑縣也睢水又東與澤湖水合水上承苗邱縣之澤陂南北百餘里東西四十里東至朝解亭西屆彭城苗邱縣之故城東王莽更名之曰善邱矣其水自陂南系于睢水睢水又東南八丈故溝水注之水上承蘄水而北會睢水又東逕符離縣故城北漢武帝元光四年封路博德為

侯國

沈氏曰是元狩四年封又按漢表曰邳離屬朱虛此從史記年表

王莽之符合也

睢水又東逕臨淮郡之取慮縣故城北昔汝南步游張少失其母及為縣令遇母于此乃使良馬踟躕輕軒罔進顧訪病姬乃其母也誠願宿憑而冥感昭徵矣睢水又東合烏慈水水出縣西南烏慈渚潭漲東北流與長直故瀆合瀆舊上承蘄水北流八十五里注烏慈水烏慈水又東逕取慮縣南又東屈逕其城東而北流注于睢睢水又東逕睢陵縣故城北漢武帝元朔元年封江都易王子劉楚為侯國一清按索隱曰表在淮陵王莽之睢陸也睢水又東與僮水故瀆會舊上承僮縣西南僮陂東北流



逕僮縣故城北又東北逕睢陵縣下會睢水又東南流逕下相縣故城南高祖十二年封莊侯冷耳為侯國應劭曰下相水出沛國相縣故此加下也然則下相又是睢水之別名也沛國故加下不名下相水道元誤矣東南流入于泗謂之睢口經止蕭縣非也所謂得其一而亡其二矣

瓠子河出東郡濮陽縣北河

縣北十里即瓠河口也尚書禹貢雷夏既澤離沮會同爾雅曰水自河出為離許慎曰離者河離水也雷澤甚詳而離沮甚略殆以不見班志故耶括地志曰雷夏澤在濮州雷澤縣郭外西北離沮二水在澤西北

平地元和志云去縣十四里則明有其處矣會彥和則引爾雅水自河出為離許慎曰離水在宋離之下流入于睢水睢水其沮水與晁以道亦引河出為離濟出為澧求之于韻沮有澧音胡拙明非之以為汜離皆出豫入徐于竟無涉又云澧沮皆濟水所出而河不與焉故鄭康成欲破周禮職方竟州其浸盧維為雷離通典不從以濟陽盧縣自有盧水高密莒縣自有維水胡拙明又非之以周時徐并于青竟不得越青而東有維濟陽之盧水古不著名周禮多古字靈似盧離似維也且裴駟史記集解引康成說云雍水沮水相觸而合入此澤中問百詩曰下一觸字鄭蓋以目驗知之惟雷澤之下流未知何往大抵不南注濟則北注濮濮亦終歸于濟也二水為禹貢著名之水不容不詮要在雷澤之傍者近是道元注甚鶻突且移而被之岐西之雍沮專門名家之學疎繆若此真卷中一話柄也暨漢元光三年河水南決漂害民居武帝元封二年前使汲仁郭昌發卒數萬人塞瓠子決河于是上自萬里沙還臨決河沈白馬玉璧令羣臣



將軍以下皆負薪填決河上悼功之不成乃作歌曰瓠  
子決兮將奈何一清按漢書此下有浩浩彈為河兮地  
不甯功無已時兮吾山平吾山平兮巨野溢魚沸鬱兮  
柏冬日正道弛兮離常流蛟龍騁兮放遠游歸舊川兮  
神哉沛不封禪兮安知外皇謂河公兮何不仁泛濫不  
止兮愁吾人齧桑浮兮淮泗滿久不返兮水唯緩一日  
河湯湯兮激潺湲北渡迴兮迅流難塞長菱兮湛美玉  
一清按漢書此下有河公許兮薪不屬薪不屬兮隕竹  
衛人罪燒蕭條兮噫乎何以禦水屬字與玉字叶  
隕竹  
林兮榘石蓄宜防塞兮萬福來於是卒塞瓠子口築宮  
於其上名曰宣房宮故亦謂瓠子堰為宣房堰而水亦

以瓠子受名焉平帝已後未及修理河水東浸日月彌  
廣永平十二年顯宗詔樂浪人王景治渠築堤起自滎  
陽東至千乘一千餘里景乃防遏衝要疏決壅積瓠子  
之水絕而不通唯溝瀆存焉河水舊東流逕濮陽城東  
北故衛地帝顓頊之墟昔顓頊自窮桑徙此號曰商邱  
或謂之帝邱本陶唐氏火正闕伯之所居亦夏伯昆吾  
之都殷之相土又都之故春秋傳曰闕伯居商邱相土  
因之是也全氏曰帝邱豈商邱耶闕伯之商邱在睢陽  
非帝邱也王伯厚曰此蓋出于帝王世紀之  
謬一清按寰宇記云衛南縣東北七十里土山村即  
古帝邱衛成公遷于此酈氏以商邱當之真屬臆說  
衛  
成公自楚邱遷此秦始皇徙衛君角于野王置東郡治



水經注釋卷二十四

濮陽縣濮水逕其南故曰濮陽也沛公守濮陽環之以

水張晏曰依河水自固一清按漢書謂章邯守濮陽耳非沛公也所引張晏注亦鈔變

其詞元文是張晏曰依河水以自環繞作壘也又東逕鹹城南春秋僖公十三

年夏會于鹹杜預曰東郡濮陽縣東南有鹹城者是也

瓠子故瀆又東逕桃城南春秋傳曰分曹地自洮盡曹

地也一清按傳文是分曹地自洮以南東傳于濟今鄆城西南五十里有桃

城或謂之洮也一清按方輿紀要桃城亦曰姚城因姚墟而名援神契舜生姚墟應劭曰姚墟

與雷澤相近世稱爲姚城是也瓠瀆又東南逕清邱北春秋宣公十二

年經書楚滅蕭晉人宋衛曹同盟于清邱京相璠曰在

今東郡濮陽縣東南三十里魏東郡都尉治

東至濟陰句陽縣爲新溝

瓠河故瀆又東逕句陽縣之小成陽城北側瀆帝王世

紀曰堯葬濟陰成陽西北四十里是爲穀林墨子以爲

堯堂高三尺土階三等北教入狄道死葬蛩山之陰山

海經曰堯葬狄山之陽一名崇山二說各殊以爲成陽

近是堯冢也余按小成陽在成陽西北半里許實中俗

嘑以爲囚堯城土安蓋以是爲堯冢也瓠子北有都關

縣故城縣有羊里亭瓠河逕其南爲羊里水蓋資城地

而變名由經有新溝之異稱矣黃初中賈逵爲豫州刺

史與諸將征吳于洞浦有功魏封逵爲羊里亭侯邑四

水經注釋卷二十四



百戶卽斯亭也俗名之羊子城非也蓋韻近字轉耳又  
東右會濮水枝津水上承濮渠東逕鉏邱城南京相璠  
曰今濮陽城西南十五里有沮邱城六國時沮楚同音  
以爲楚邱非也又東逕浚城南西北去濮陽三十五里  
城側有寒泉岡卽詩所謂爰有寒泉在浚之下世謂之  
高平渠非也京相璠曰濮水故道在濮陽南者也又東  
逕句陽縣西句瀆出焉濮水枝渠又東北逕句陽縣之  
小成陽城東故垂亭西而北入瓠河地理志曰濮水首  
受沛于封邱縣東北至都關入羊里水者也又按地理  
志山陽郡有都關縣今其城在廩邱城西考地志山陽

廩邱俱屬濟陰則都關無隸山陽理又按地理志鄆都  
亦是山陽之屬縣矣而京杜考地驗城又並言在廩邱  
城南推此而論似地志之誤矣或亦疆理參差所未詳  
瓠瀆又東逕垂亭北春秋隱公八年宋公衛侯遇于犬  
邱經書垂也京相璠曰今濟陰句陽縣小成陽東五里  
有故垂亭者也

又東北過廩邱縣爲濮水

瓠河又左逕雷澤北其澤藪在大成陽縣故城西北一  
十餘里昔華胥履大蹟處也其陂東西二十餘里南北  
一十五里卽舜所漁也澤之東南卽成陽縣故史記曰



武王封弟季載于成應劭曰其後乃遷于成之陽故曰成陽也地理志曰成陽有堯冢靈臺今成陽城西二里有堯陵陵南一里有堯母慶都陵於城爲西南稱曰靈臺鄉曰崇仁邑號修義皆立廟四周列水潭而不流水澤通泉泉不耗竭至豐魚筍不敢採捕前並列數碑栝柏數株檀馬成林二陵南北列馳道徑通皆以磚砌之尚修整堯陵東城西五十餘步中山夫人祠堯妃也石壁階墀仍舊南西北三面長櫟聯蔭扶疎里餘中山夫人祠南有仲山甫冢冢西有石廟羊虎傾低破碎略盡於城爲西南在靈臺之東北按郭緣生述征記自漢迄

晉二千石及丞尉多刊石述敘堯卽位至永嘉三年二

千七百二十有一載記于堯妃祠見漢建甯四年五月

一清按四年當作五年成陽靈臺碑云建甯五年五月造後漢書靈帝紀以夏五月己巳始改建甯五年爲熹平元年故建甯無五年也造碑時尙未知有改元事故碑題仍稱五年鄴以紀元建甯無五年遂作四年豈得其實乎抑或後人妄更未可知也成陽令管遵所立碑文云堯陵北仲

山甫墓南二冢閒有伍員祠晉大安中立一碑是永興

中建今碑祠並無處所又言堯陵在城南九里中山夫

人祠在城南二里東南六里堯母慶都冢堯陵北二里

有仲山甫墓考地驗狀咸爲疎僻蓋聞疑書疑耳一清按隸

釋有濟陰太守孟郁修堯廟碑威宗永康元年又帝堯碑靈帝熹平四年又成陽靈臺碑建甯五年三碑俱云

水經注釋

卷二十四

四



水經有今本祇有漢建甯四年五月成陽令管遵所立  
碑即成陽靈臺碑也上二碑無之蓋失矣洪氏適曰  
成陽靈臺碑篆額靈臺建甯五年立與堯廟二碑在成  
陽皆有陰堯葬慶都于成陽名曰靈臺上立黃屋為奉  
祠之所漢綴其祀至亡新而劉於是廷尉仲定奏請興  
治郡守審是縣令管遵各遣大掾助成之按兩漢地志  
濟陰成陽有堯冢靈臺不明言靈臺為堯母冢也章帝  
紀元和二年使堯冢靈臺不唐堯於成陽靈臺注引郭緣生  
述征記曰成陽有堯陵南一里有堯母慶都陵稱曰  
靈臺據此則與碑合靈臺有堯母冢明矣集古錄曰按  
皇覽云堯冢在濟陰城陽呂氏春秋云堯葬穀林皇甫  
謐云穀林即成陽也然自史記地志及水經諸書皆無  
堯母葬處唯見于此碑蓋亦葬成陽也而諸書俗本多  
為城陽獨此碑為成陽當以碑為正金石錄跋尾云成  
陽屬今雷澤歐陽公以為自史記地志及水經諸書皆  
無堯母葬處余按班固西漢劉昭東漢書地理志皆曰  
成陽有堯冢靈臺而東漢志章帝元和二年東巡狩將  
至泰山道使使者奉一太牢祠堯于濟陰成陽靈臺  
與章帝紀所載正同帝紀章懷太子注引郭緣生述征  
記云成陽東南有堯母慶都墓上有祠廟堯母陵俗亦

名靈臺文母水經注今成陽城西二里有堯陵南一里  
有堯母慶都陵於城為西南稱曰靈臺蓋兩漢史所載  
似以靈臺為堯冢唯此碑與述征記水經乃直指為堯  
母冢爾然水經云在成陽西南而述征記云在東南余  
為淄州同官李堯雷澤人云冢正在城西西南蓋述征記  
誤路史辨帝堯冢曰堯冢在濟陰成陽堯母靈臺在南  
歐陽文忠公集堯冢古錄言靈臺碑以為史記地志水經諸  
書皆無堯母葬處粵稽地志及范氏志水經注言堯陵  
慶都陵明白若此惡得云無耶然述征記云在成陽東  
南今之所識乃在城陽西南四十里穀林則古今疆場  
相出入有同者郭氏所記乃小成陽穀林在其下小成  
陽西北五十里隸于河南有山曰成陽穀林在其下小成  
陽以山得名乃堯葬母所在有堯冢故名文忠跋謂俗  
本多作城陽獨此碑為成陽夫成陽與城陽正自二所  
成陽隸濟陰乃古之成陽乃漢齊悼惠王子章所食之  
國今之兗州是矣雷澤西南十許里有小山孤立峻上  
不得混為一也

亭亭傑峙謂之歷山山北有小阜南屬迤澤之東北有



陶墟緣生言舜耕陶所在墟阜聯屬濱帶瓠河也鄭元曰歷山在河東今有舜井皇甫謐或言今濟陰歷山是也與雷澤相比余謂鄭元之言爲然故揚雄河東賦曰登歷觀而遙望兮聊浮游于河之巖今雷首山西枕大河校之圖緯於事爲允士安又云定陶西南陶邱舜所陶也不言在此緣生爲失瓠河之北卽廩邱縣也王隱晉書地道記曰廩邱者春秋之所謂齊邑矣實表東海者也竹書紀年晉烈公十一年田悼子卒田布殺其大夫公孫孫公孫會以廩邱叛于趙田布圍廩邱翟角趙孔肩韓師救廩邱及田布戰于龍澤田布敗逋是也瓠

河與濮水俱東流經所謂過廩邱爲濮水者也縣南瓠北有羊角城春秋傳曰烏餘取衛羊角遂襲我高魚天大雨自竇入介其庫登其城剋而取之者也京相璠曰衛邑也今東郡廩邱縣南有羊角城高魚魯邑也今廩邱東北有故高魚城俗謂之交魚城謂羊角爲角逐城皆非也瓠河又逕陽晉城南史記蘇秦說齊曰過衛陽晉之道全氏曰按胡三省曰所謂衛陽晉者以魏境有陽晉故稱衛陽晉以別之史記秦取魏陽晉是也經于亢父之險者也今陽晉城在廩邱城東南一十餘里與都關爲左右者也張儀曰秦下甲攻衛陽晉大關天下之匈徐廣史記音義云關一作開清按此十字注中注



東之亢父則其道矣瓠河之北又有郟都城春秋隱公五年郟侵衛京相璠曰東郡廩邱縣南三十里有郟都故城地理志曰山陽鄉也一清按鄉當作縣褚先生曰漢封金安上為侯國王莽更名之曰城穀者也按褚表金安上封都成侯漢表同索隱曰志屬潁川而地理志無之然金日磾封秬侯秬屬濟陰安上之封必與日磾附近山陽濟陰又地界連接瓠河又東逕黎縣故城南王莽改曰黎治矣孟康曰今黎陽也薛瓚言按黎陽在魏郡非此黎陽也一清按師古註引瓚曰黎陽在魏郡非黎縣也道元蓋鈔變其詞世謂黎侯城昔黎侯陽寓于衛全氏曰據善長說陽似黎侯名誤矣詩所謂胡為乎泥中毛云泥中邑名疑此城也土地汙下城居小阜魏濮陽郡治也瓠

河又東逕秬縣故城南地理志曰濟陰之屬縣也褚先生曰漢武帝封金日磾為侯國王莽之萬歲矣世猶謂之為萬歲亭也瓠河又東逕鄆城南春秋左傳成公十六年公自沙隨還待于鄆京相璠曰公羊作運字今東郡廩邱縣東八十里有故運城即此城也又北過東郡范縣東北為濟渠與將渠合瓠河自運城東北逕范縣與濟濮枝渠合故渠上承濟瀆於乘氏縣北逕范縣左納瓠瀆故經有濟渠之稱又北與將渠受河於范縣西北東南逕秦亭南杜預釋地曰東平范縣西北有秦亭也又東南逕范縣故城南王



莽更名建睦也漢興平中靳允為范令曹太祖東征陶謙於徐州張邈迎呂布郡縣響應程昱說允曰君必固范我守東阿田單之功可立即斯邑也將渠又東會濟渠自下通謂之將渠北逕范城東俗又謂之趙溝非也又東北過東阿縣東

瓠河故瀆又東北左合將渠故瀆上承將渠于范縣東北逕范縣北又東北逕東阿城南而東入瓠河故瀆又北逕東阿縣故城東春秋經書冬及齊侯盟于柯左傳曰冬盟于柯始及齊平杜預曰東阿即柯邑也按國語曹沫挾匕首劫齊桓公返遂邑于此矣全氏曰事見公羊非國語

又東北過臨邑縣西又東北過茌平縣東為鄧里渠

自宣防已下將渠已上無復有水將渠下水首受河自北為鄧里渠

又東北過祝阿縣為濟渠

河水自四瀆口出會濟水二瀆合而東注于祝阿也

又東北至梁鄒縣西分為二

脈水尋梁鄒濟無二流蓋經之誤

其東北者為濟河其東者為時水又東北至濟西濟河東北入于海時水東至臨淄縣西屈南過太山華縣東又東至費縣東入于沂



時卽彫水也音而一清按二春秋襄公三年齊晉盟于字注中注彫者也京相璠曰今臨淄唯有澆水西北入沛卽地理志之如水矣彫如聲相似然則澆水卽彫水也蓋以澆與時合得通稱矣時水自西安城西南分爲二水枝津別出西流德會水注之水出昌國縣黃山西北流逕昌國縣故城南昔樂毅攻齊有功燕昭王以是縣封之爲昌國君德會水又西北五里泉水注之水出縣南黃阜北流逕城西北入德會又西北世謂之滄浪溝又北流注時水地理志曰德會水出昌國西北至西安入如是也時水又西逕東高宛城中而西注也俗人遏令側城

南注又屈逕其城南南史記漢文帝十五年分齊爲膠西

王國都高宛徐廣音義曰樂安有高宛城故俗謂之東

高宛也

一清按道元此注是據史記漢興以來諸侯年表而文帝紀及漢志皆云十六年又史記世家

膠西王卬齊悼惠王子以昌平侯文帝十六年爲膠西王十一年與吳楚反漢擊破殺卬地入于漢爲膠西郡又五宗世家膠西王端用皇世子爲膠西王立四十七年卒國除爲郡而地理志云宣帝本始元年更爲高密國首高密縣豈膠西國廢復置高密國而改治者與巨洋水注又云高密郡治桑犢亭世謂之故郡城地志桑犢北海之屬縣也後漢郡縣皆廢故續志無之其水又北注故瀆又西蓋野溝

水注之源導延鄉城東北平地出泉西北逕延鄉城北

地理志曰千乘有延鄉縣世人謂故城爲從城延從字相似讀隨字改所未詳也西北流世謂之蓋野溝又西



北流逕高宛縣北注時水時水又西逕西高宛縣故城南漢高帝六年封丙倩爲侯國王莽之常鄉也其水側城西注京相璠曰今樂安博昌縣南界有時水西通濟其源上出盤陽北至高宛下有死時中無水杜預亦云時水於樂安枝流旱則竭涸爲春秋之乾時也左傳莊公九年齊魯戰地魯師敗處也時水西北至梁鄒城入于沛全氏曰時水二支一至梁鄒入濟者其流甚短一東行至鉅定入馬車瀆者其流甚長別見淄水注此道元所非沛入時蓋時來注沛若沛分東流明不得以時爲名尋時沛更無別流南延華費之所斯爲繆矣汶水出太山萊蕪縣原山西南過羸縣南

萊蕪縣在齊城西南原山又在縣西南六十許里地理志汶水與淄水俱出原山西南入沛故不得過其縣南

也

一清按經自謂汶水過羸縣南耳不云過萊蕪縣南也酈之詮詁殆自相伐

從征記曰汶

水出縣西南流又言自入萊蕪谷夾路連山百數里水隍多行石澗中出藥草饒松柏林藿綿濛崖壁相望或傾岑阻徑或迴巖絕谷清風鳴條山壑俱響凌高降深兼惴慄之懼危蹊絕徑過懸度之艱未出谷十餘里有別谷在孤山谷有清泉泉上數丈有石穴二口容人行入穴丈餘高九尺許廣四五丈言是昔人居山之處薪爨烟墨猶存谷中林木緻密行人尠有能至矣又有少



許山田引灌之踪尙存出谷有平邱面山傍水土人悉以種麥云此邱不宜殖稷黍而宜麥齊人相承以殖之意謂麥邱所栖愚公谷也何其深沉幽翳可以託業怡生如此也余時逕此爲之踟躕爲之屢眷矣余按麥邱愚公在齊不在魯川谷猶傳其名蓋誌者之謬耳汶水又西南逕羸縣故城南春秋左傳桓公三年公會齊侯于羸成婚于齊也

### 又東南過奉高縣北

奉高縣漢武帝元封元年立以奉太山之祀太山郡治也縣北有吳季札子墓在汶水南曲中季札之聘上國

也喪子於羸博之間卽此處也從征記曰羸縣西六十里有季札兒冢冢圓其高可隱也前有石銘一所漢末奉高令所立無所述敘標誌而已自昔恆蠲民戶灑掃之今不能然碑石糜碎靡有遺矣唯故趺存焉

### 屈從縣西南流

汶出牟縣故城西南阜下俗謂之胡盧堆淮南子曰汶

出弗其高誘曰山名也或斯阜也

一清按高誘曰弗其山名在朱虛縣東此

青州之東汶其水東北流入濰見下二牟縣故城在東

十六卷道元以牟縣胡盧堆當之誤矣北古牟國也春秋時牟人朝魯故應劭曰魯附庸也俗謂是水爲牟汶也又西南逕奉高縣故城西西南流注



于汶汶水又南右合北汶水水出分水谿源與中川分水東南流逕太山東合天門下谿水水出太山天門下谷東流古者帝王升封咸憇此水水上往往有石竅存焉蓋古設舍所跨處也馬第伯書云光武封太山第伯從登山去平地二十里南向極望無不覩其為高也如視浮雲其峻也石壁窅窅仰視巖石松樹鬱鬱蒼蒼如在雲中俯視谿谷碌碌不可見丈尺直上七里天門仰視天門如從穴中視天矣應劭漢官儀云太山東南山頂名曰日觀者雞一鳴時見日始欲出長三丈許故以名焉其水自谿而東濬波注壑東南流逕龜陰之田龜

山在博縣北一十五里昔夫子傷政道之陵遲故望山而懷操故琴操有龜山操焉山北即龜陰之田也春秋定公十年齊人來歸龜陰之田是也又合環水水出太山南谿南流歷中階兩廟閒從征記曰太山有下中上三廟牆闕嚴整廟中柏樹夾兩階大二十餘圍蓋漢武所植也赤眉嘗斫一樹見血而止今斧創猶存門閣三重樓榭四所三層壇一所高丈餘廣八尺樹前有大井極香冷異于凡水不知何代所掘不常浚濶而水旱不減廟中有漢時故樂器及神車木偶皆靡密巧麗又有石勒建武十三年一清按建武是石虎年號注誤證永貴侯張余上金



馬一匹高二尺餘形制甚精中廟去下廟五里屋宇又

崇麗于下廟廟東西夾澗上廟在山頂卽封禪處也其

水又屈而東流入于汶水一清按四又東南流逕南

封太山降坐明堂於山之東北陞武帝以古處嶮狹而

不顯也欲治明堂於奉高傍而未曉其制濟南人公玉

帶上皇帝時明堂圖圖中有一殿四面無壁以茅蓋之

通水園宮垣爲複道上有樓從西南入名曰崑崙天子

從之入以拜祀上帝焉於是上令奉高作明堂于汶上

如帶圖也古引水爲辟雍處基瀆存焉世謂此水爲石

汶山海經曰環水出太山東流注于江一清按郭璞曰

南流逕徠山西山多松柏詩所謂徠徠之松也廣雅

曰道梓松也抱朴子稱玉策記曰千歲之松中有物或

如青牛或如青犬或如人皆壽萬歲又稱天陵有偃蓋

之松也所謂樓松也魯連子曰松縱高十仞而無枝非

憂正室之無柱也爾雅曰松葉柏身曰縱鄒山記曰徠

徠山在梁甫奉高博三縣界猶有美松亦曰尤徠之山

也赤眉渠帥樊崇所堡也故崇自號尤徠三老矣山東

有巢父廟山高十里山下有陂水方百許步三道流注



一水東北沿溪而下屈逕縣南西北流入于汶一水北流歷澗西流入于汶一水南流逕陽關亭南春秋襄公十七年逆臧紇自陽關者也又西流入于汶水也

過博縣西北

汶水南逕博縣故城東春秋哀公十一年會吳伐博者

也一清按左氏傳云為郊戰故公會吳子伐灌嬰破田齊五月取博杜預曰博齊邑注所引未備

橫於城下屈從其城南西流不在西北也汶水又西南

逕龍鄉故城南春秋成公二年齊侯圍龍龍囚頃公嬖

人盧蒲就魁殺而膊諸城上齊侯親鼓取龍者也漢高

帝八年封謁者陳署為侯國汶水又西南逕亭亭山東

黃帝所禪也山有神廟水上有石門舊分水水下漑處也

汶水又西南逕陽關故城西本鉅平縣之陽關亭矣春

秋襄公十七年逆臧紇自陽關者矣一清按十五字已見上此復出陽

虎據之以叛伐之虎焚萊門而奔齊者也汶水又南左

會淄水水出太山梁父縣東南流逕菟裘城北全氏曰此

又一淄水杜預所云入汶水者也鄭樵誤以為萊蕪之淄王士禎不知而妄非之春秋隱公十

一年營之公謂羽父曰吾將歸老焉故郡國志曰梁父

有菟裘聚淄水又逕梁父縣故城南縣北有梁父山開

山圖曰太山在左亢父在右亢父知生梁甫主死王者

封太山禪梁甫故縣取名焉淄水又西南逕柴縣故城



北地理志曰太山之屬縣也世謂之柴汶矣淄水又逕

郟縣北漢高帝六年封董濼為侯國一清按史表作成侯索隱曰屬涿郡

地理志涿郡成縣侯國春秋齊師圍郟郟人伐齊飲馬于斯水也

昔孔子行於郟之野遇榮啟期於是衣鹿裘被髮琴歌

三樂之懽夫子善其能寬矣淄水又西逕陽關城南西

流注于汶水汶水又南逕鉅平縣故城東而西南流城

東有魯道詩所謂魯道有蕩齊子由歸者也今汶上夾

水有文姜臺汶水又西南流詩云汶水滔滔矣淮南子

曰貉渡汶則死天地之性倚伏難尋固不可以情理窮

也全氏曰按王伯厚云列子釋文史記汶與岷同謂汶江也今江邊人云狐不渡江然則非東州之汶汶

水又西南逕魯國汶陽縣北王莽之汶亭也縣北有曲

水亭春秋桓公十二年經書公會杞侯莒子盟于曲池

左傳云平杞莒也故杜預曰魯國汶陽縣北有曲水亭

漢章帝元和二年東巡太山立行宮于汶陽執金吾耿

恭屯城門于汶上基塹存焉世謂之闕陵城也汶水又

西逕汶陽縣故城北西注禹貢錐指元和志乾封縣界

北汶嬴汶柴汶牟汶其一則經流也按鄆注無嬴汶嬴

汶在今萊蕪縣南三十里源出宮山之陰流合牟汶宮

山者新甫之別名也山在新泰縣西北泮水源自泰山

分水嶺即北汶州志謂之塹汶在今泰安州南五汶之

外有小汶在州東南七十里源出宮山流逕徠山南

又西入汶水所謂大汶口也嬴汶合牟汶故鄆注不言

五汶以小易嬴斯為當矣又有水出萊蕪縣寨子村流

合牟汶者近志指為沔汶據漢志瑯琊靈門縣有高泉

水經注釋

卷二十四



山語水所出東北入濰說文水出靈門山世謂之語汶  
在今莒州界與萊蕪無涉志妄言耳東汶出朱虛縣小  
泰山北流至濇于縣入濟高誘曰弗其山名在朱虛縣東是  
曰汶出弗其流入濟濟高誘曰弗其山名在朱虛縣東是  
即入濰之東汶言入濟者淮南之誤也一清按五汶之  
名始于郭緣生述征記曰泰山郡水皆名曰汶汶凡有  
五北汶羸汶柴汶語汶皆源別而流同語汶遠在瑯琊  
關入泰山郡域近志因之而誤東樵正之是矣乃欲以  
小汶易羸汶則非考泰安圖志羸汶與牟汶合自萊蕪  
縣東北流逕縣西南至泰安縣東北之故縣鎮與出仙  
臺嶺水會名曰大汶亦曰塹汶東樵以北汶為塹汶亦  
非又西南流與石汶合石汶者環水也又西南流與北  
汶合北汶者泮水也濟水篇注云半水出分水谿者是  
也四汶共流而西南小汶水會之小汶出新泰縣東北  
龍堂山西流百二十里入泰安縣東南境至縣西南逕  
徂徠山南故柴城北而合于大汶尋其川脈即古柴汶  
之道柴汶本出梁父縣東西流逕菟裘城又西流逕郟  
父縣故城又西流逕柴縣故城又西流逕郟縣北又西  
流逕陽關城南而西合于汶水今梁父縣東之上源已  
絕而下流僅至古柴城即入于大汶不能至陽關城陽

關城更在古柴城之西然小汶之行甚遠其吐納眾水  
亦甚夥儻古有是水道元無容不詳記之此必溝通之  
以合于柴汶其後水流既盛而柴汶遂為所奪大汶小  
汶之名皆起于後世彼以合羸牟北石四汶故名之曰  
大此則專合柴汶故名曰小是五汶者又并而為二以  
出于大汶口西歷桐城壩又西北歷戴村壩入于大清  
河即古濟水之故道也蓋羸牟二汶由東達西橫水也  
北石二汶自南注北直水也柴汶出東北以注西南亦  
橫水也五汶之名不當去羸以郭記李志皆先記之矣  
道元不別出羸汶者以羸為汶水發源經流也郭記書  
中屢引之而此獨不從其說未知何故豈亦以其誤  
數語汶為不足據耶予有五汶考五篇辭多不載

又西南過蛇邱縣南

汶水又西洸水出焉又西逕蛇邱縣南縣治鑄鄉故城

春秋左傳宣叔娶于鑄是也杜預曰濟北蛇邱縣所治

鑄鄉城者也



又西南過岡縣北

地理志岡故闡也王莽更之曰柔也

一作剛縣故新莽以

柔易稱應劭曰春秋經書齊人取謹及闡是也杜預春秋

釋地曰闡在剛縣北岡城東有一小亭今岡縣治俗人

又謂之闡亭京相璠曰岡縣西四十里有闡亭未知孰

是汶水又西蛇水注之水出縣東北泰山西南流逕汶

陽之田齊所侵也自汶之北平暢極目僖公以賜季友

蛇水又西南逕鑄城西左傳所謂蛇淵圍也故京相璠

曰今濟北有蛇邱城城下有水魯圍也俗謂之濁須水

非矣蛇水又西南逕夏暉城南經書公會齊侯于下謹

是也今俗謂之夏暉城蓋春秋左傳桓公三年公子翬

如齊齊侯送姜氏于下謹非禮也是也世有夏暉之名

矣蛇水又西南入汶汶水又西溝水注之水出東北馬

山西南流逕棘亭南春秋成公三年經書秋叔孫僑如

帥師圍棘左傳曰取汶陽之田棘不服圍之南去汶水

八十里又西南逕遂城東地理志曰蛇邱遂鄉故遂國

也春秋莊公十三年齊滅遂而戍之者也京相璠曰遂

在蛇邱東北十里杜預亦以為然然縣東北無城以擬

之今城在蛇邱西北蓋杜預傳疑之非也又西逕下謹

城西而入汶水汶水又西逕春亭北考古無春名唯平



陸縣有崇陽亭然是亭東去岡城四十里推璠所注則符並所未詳也一清按推璠所注謂京相璠春秋土地名也是注既不引其書何為濫及乎

又西南過東平章縣南

地理志曰東平國故梁也景帝中六年別為濟東國武帝元鼎元年為大河郡宣帝甘露二年為東平國王莽之有鹽也章縣按世本任姓之國也春秋齊人降章者也故城在無鹽東北五十里汶水又西南有泌水注之水出肥成縣東北白原西南流逕肥成縣故城南樂正子春謂其弟子曰子適齊過肥肥有君子焉左逕句窳亭北章帝元和二年鳳凰集肥城句窳亭復其租而巡

泰山卽是亭也泌水又西南逕富城縣故城西王莽之成富也其水又西南流注于汶汶水又西南逕桃鄉縣故城西王莽之鄣亭也世以此為鄣城非蓋因亡新之故目耳

又西南過無鹽縣南又西南過壽張縣北又西南至安民亭入于濟

汶水自桃鄉四分當其派別之處謂之四汶口其左二水雙流西南至無鹽縣之郕鄉城南魯叔孫昭伯之故邑也禍及鬪雞矣全氏曰郕昭伯以鬪雞啟禍昭伯春亡後郕始歸叔孫昭子善長誤矣春秋左傳定公十二年叔孫氏墮郕今其城無南面汶水



又西南逕東平陸縣故城北應劭曰古厥國也今有厥  
 亭汶水又西逕危山南世謂之龍山也漢書五行志曰  
 哀帝時無鹽危山土自起覆草如馳道狀又瓠山石轉  
 立晉灼曰漢注作報山全氏曰八字注中注一清按漢  
 志北海郡瓠縣師古曰瓠即報  
 字而宣元六王傳瓠山晉灼曰漢注作報山師古曰報  
 山古作瓠字為其形似瓠耳又通而為瓠地理志河東  
 瓠譚之狐史漢表俱作瓠徐廣  
 曰音胡索隱曰即瓠字可證也山脇石一枚轉側起立  
 高九尺六寸傍行一丈廣四尺東平王雲及后謁曰漢  
 世石立宣帝起之表也自之石所祭治石象報山立石  
 束倍草并祠之建平三年息夫躬告之王自殺后謁棄  
 市國除何氏曰事在宣元六王傳  
 非五行志也善長誤矣汶水又西合為一水

西南入茂都澱澱陂水之異名也澱水西南出謂之巨  
 野溝又西南逕致密城南郡國志曰西昌縣有致密城  
 古中都也即夫子所宰之邑矣制養生送死之節長幼  
 男女之禮路不拾遺器不彫偽矣巨野溝又西南入桓  
 公河北水西出澱謂之巨良水西南逕致密城北西南  
 流注洪瀆次一汶西逕郈亭北又西至壽張故城東逕  
 為澤渚初平三年曹公擊黃巾於壽張東鮑信戰死于  
 此其右一汶西流逕無鹽縣之故城南舊宿國也齊宣  
 后之故邑所謂無鹽醜女也漢武帝元朔四年封城陽  
 共王子劉慶為東平侯即此邑也王莽更名之曰有鹽



水經注釋 卷二十四  
泗水  
亭汶水又西逕郟鄉城南地理志所謂無鹽有郟鄉者  
也汶水西南流逕壽張縣故城北春秋之良縣也縣有  
壽聚漢曰壽良應劭曰世祖叔父名良故光武改曰壽  
張也建武十五年世祖封樊宏爲侯國汶水又西南長  
直溝水注之水出須昌城東北穀陽山南逕須昌城東  
又南漆溝水注焉水出無鹽城東北五里阜山下西逕  
無鹽縣故城北水側有東平憲王蒼冢碑闕存焉元和  
二年章帝幸東平祀以太牢親拜祠坐賜御劔于陵前  
其水又西流注長直溝溝水奇分爲二一水西逕須昌  
城南入沛一水南流注于汶汶水又西流入沛故淮南

子曰汶出弗其西流合沛高誘云弗其山名在朱虛縣  
東余按誘說是乃東汶非經所謂入沛者也蓋其誤證  
耳



水經注釋卷二十四終

海甯錢保塘  
華陽吳祖椿覆校

水經注釋卷二十五

仁和趙一清誠夫錄

泗水

沂水

洙水

泗水出魯卞縣北山

地理志曰出濟陰乘氏縣又云出卞縣北

閻氏若璩潛邱劉記曰泗

水出乘氏此出字乃後人所加班固自註原無出字漢書未可輕也一清按地志卞縣下亦無出字經言

北山皆為非矣山海經曰泗水出魯東北余昔因公事

泂歷徐沅路逕洙泗因令尋其源流水出卞縣故城東

南桃墟西北春秋昭公七年謝息納季孫之言以孟氏

成邑與晉而遷于桃杜預曰魯國卞縣東南有桃墟



按舜後姓姚又賜姓媯此桃墟當因姚  
墟而訛沔水亦有姚墟媯墟之稱也  
世謂之曰陶墟  
舜所陶處也井曰舜井皆爲非也墟有漏澤方一十五  
里涿水澂淳三丈如減澤西際阜俗謂之媯亭山蓋有  
陶墟舜井之言因復有媯亭之名矣阜側有三石穴廣  
圓三四尺穴有通否水有盈漏漏則數夕之中傾破竭  
澤矣左右民居識其將漏預以木爲曲沃約障穴口魚  
鼈暴鱗不可勝載矣自此連岡通阜西北四十許里岡  
之西際便得泗水之源也博物志曰泗出陪尾蓋斯阜  
者矣石穴吐水五泉俱導泉穴各徑尺餘水源南側有  
一廟栝柏成林時人謂之原泉祠非所究也泗水西逕

其縣故城南春秋襄公二十九年季武子取卞曰聞守  
卞者將叛臣率徒以討之是也南有姑蔑城春秋隱公  
元年公及邾儀父盟于蕞者也水出二邑之間西逕郚  
城北春秋文公七年經書公伐邾三月甲戌取須句遂  
城郚杜預曰魯邑也卞縣南有郚城備邾難也泗水自  
卞而會于洙水也

### 西南過魯縣北

泗水又西南流逕魯縣分爲二流水側有一城爲二水  
之分會也北爲洙瀆春秋莊公九年經書冬浚洙京相  
璠曰服虔杜預竝言洙水在魯城北浚深之爲齊備也



南則泗水夫子教于洙泗之間今于城北二水之中即  
夫子領徒之所也從征記曰洙泗二水交于魯城東北  
十七里闕里背洙面泗南北一百二十步東西六十步  
四門各有石闕北門去洙水百步餘後漢初闕里荆棘  
自闕從講堂至九里鮑永爲相因修饗祠以誅魯賊彭  
豐等郭緣生言泗水在城南非也余按國語宣公夏濫  
于泗淵里革斷罔棄之韋昭云泗在魯城北一清按日  
知錄公羊  
閔公二年傳桓公使高子將南陽之甲立僖公而城魯  
或曰自鹿門至于爭門者也或曰自爭門至于吏門者  
也注鹿門魯南城東門也據左傳滅紇斬鹿門之關出  
奔邾是也爭門吏門並闕按說文淨魯城門池也从水  
爭聲士耕切是爭門即以此水名省文作爭爾後人以  
澗字省作淨音才性切而梵書用之自南北史以下俱

爲才性之淨而魯之爭門不復知之今考道元所記  
魯城北爲泗水則此地當是引泗以爲濠而失記之

記冢墓記王隱地道記咸言葬孔子於魯城北泗水上

今泗水南有夫子冢春秋孔演圖曰烏化爲書孔子奉  
以告天赤爵銜書上化爲黃玉刻曰孔提命作應法爲  
赤制說題辭曰孔子卒以所受黃玉葬魯城北即子貢  
廬墓處也譙周云孔子死後魯人就冢次而居者百有  
餘家命曰孔里孔叅曰夫子墓塋方一里在魯城北六  
里泗水上諸孔氏封五十餘所人名昭穆不可復識有  
銘碑三所獸碣具存皇覽曰弟子各以四方奇木來植  
故多諸異樹不生棘木刺草今則無復遺條矣泗水自



城北南逕魯城西南合沂水沂水出魯城東南尼邱山  
西北山卽顏母所祈而生孔子也山東一十里有顏母  
廟山南數里孔子父葬處禮所謂防墓崩者也平地發  
泉流逕魯縣故城南水北東門外卽爰居所止處也國  
語曰海鳥曰爰居止於魯城東門之外三日臧文仲祭  
之展禽譏焉故莊子曰海鳥止郊魯侯觴之奏以廣樂  
具以太牢三日而死此養非所養矣門郭之外亦戎夷  
死處呂氏春秋曰昔戎夷違齊如魯天大寒而後門與  
弟子宿於郭門外寒愈甚謂弟子曰子與我衣我活我  
與子衣子活我國士也爲天下惜子不肖人不足愛弟

子曰不肖人惡能與國士并衣哉戎夷歎曰不濟夫解  
衣與弟子半夜而死沂水北對稷門昔圉人犖有力能  
投蓋于此門服虔曰能投千鈞之重過門之上也杜預  
謂走接屋之桷反覆門上也春秋僖公二十年經書春  
新作南門左傳曰書不時也杜預曰本名稷門僖公更  
高大之今猶不與諸門同改名高門也其遺基猶在地  
八丈餘矣亦曰雩門春秋左傳莊公十年公子偃請擊  
宋師竊從雩門蒙臯比而出者也門南隔水有雩壇壇  
高三丈曾點所欲風舞處也高門一里餘道西有道兒  
君碑是魯相陳君立昔曾參居此臯不入境縣卽曲阜



之地少昊之虛有大庭氏之庫春秋豎牛之所攻也故  
 劉公幹魯都賦曰戢武器於有炎之庫放戎馬於巨野  
 之垆周成王封姬旦於曲阜曰魯秦始皇二十三年以  
 為薛郡漢高后元年為魯國全氏曰按是文引漢志然實班氏之誤高后以城陽  
為魯國不以薛郡其時薛郡屬楚國阜上有季氏宅宅有武子臺今雖崩  
 夷猶高數丈臺西百步有大井廣三丈深十餘丈以石  
 壘之石似磬制春秋定公十二年公山不狃帥費人攻  
 魯公入季氏之宮登武子之臺也臺之西北二里有周  
 公臺高五丈周五十步臺南四里許則孔廟即夫子之  
 故宅也宅大一頃所居之堂後世以為廟漢高祖十三

年過魯以太牢祀孔子自秦燒詩書經典淪缺漢武帝  
 時魯共王壞孔子舊宅得尚書春秋論語孝經時人已  
 不復知有古文謂之科斗書漢世秘之希有見者于時  
 聞堂上有金石絲竹之音乃不壞矣廟屋三間夫子在  
 西間東向顏母在中間南面夫人隔東一間東向夫子  
 牀前有石硯一枚作甚朴云平生時物也魯人藏孔子  
 所乘車於廟中是顏路所請者也獻帝時廟遇火燒之  
 永平中鍾離意為魯相到官出私錢萬三千文付戶曹  
 孔詵治夫子車身入廟拭几席劍履男子張伯除堂下  
 草土中得玉璧七枚伯懷其一以六枚白意意令主簿



安置几前孔子寢堂牀首有懸甕意召孔訢問何等甕也對曰夫子甕也背有丹書人勿敢發也意曰夫子聖人所以遺甕欲以懸示後賢耳發之中得素書文曰後世修吾書董仲舒護吾車拭吾履發吾笥會稽鍾離意璧有七張伯藏其一意即召問伯果服焉魏黃初二年金石錄跋尾曰魏志文帝以黃初二年正月下詔今以碑考之乃黃初元年詔語亦小異當以碑為正文帝令郡國修起孔子舊廟置百戶吏卒一清按原本作百夫吏卒誤也曹植撰孔羨奉家祀碑作百戶吏卒今是碑載隸釋關里志作百戶卒史三國志魏紀黃初二年以議郎孔羨為宗聖侯邑百戶奉孔子祀令魯郡修起舊廟置百戶吏卒以守衛之與碑足相證明隸釋關里志所改則非也而顧炎武金石文字記曰百石卒史者秩百石之卒也漢書儒林傳郡國置五經百石卒史倪寬傳補廷

尉文學卒史臣瓚曰漢注卒史秩百石是也然其自注又云杜氏通典作百戶吏卒三國志同蓋未能審定爾何焯曰亭林但據桓帝永興元年魯相乙瑛置孔子廟百石卒史不知黃初自置百戶吏卒未可執此例彼也百石卒史掌領禮器選年四十以上經通六藝雜試通利能奉宏先聖之禮為宗所歸者乃是孔氏子孫為之守衛之人耳廟有夫子像列二弟子執卷立侍穆穆有詢仰之容漢魏以來廟列七碑二碑無字栝柏猶茂清一按注云廟列七碑二碑無字則五碑有文字可知矣並見隸釋一孔廟置守廟百石孔鯀碑威宗永興元年一魯相韓勅造孔廟禮器碑永壽二年一韓勅修孔廟後碑永壽三年一魯相史晨祠孔廟奏銘靈帝建甯二年一史晨饗孔廟後碑俱云水經有故知即是七碑中之五碑也孔宏復闕里志云語云世遠言湮文獻難徵之謂也曲阜為天下宗國歷代表揚無遺矣累朝典禮疆域規模陵廟增飾猶多湮沒惟水經注存漢魏之迹東遊記詳魯疆之樂斯文不亡闕里之幸廟之西北二里也東遊記是元皇慶中紫陽楊奐著



九經注釋 泗水 六  
有顏母廟廟像猶嚴有修栝五株孔廟東南五百步有  
雙石闕卽靈光之南闕北百餘步卽靈光殿基東西二  
十四丈南北十二丈高丈餘東西廊廡別舍中間方七  
百餘步闕之東北有浴池方四十許步池中有釣臺方  
十步臺之基岸悉石也遺基尙整故王延壽賦曰周行  
數里仰不見日者也是漢景帝程姬子魯共王之所造  
也殿之東南卽泮宮也在高門直北道西宮中有臺高  
八十尺臺南水東西一百步南北六十步臺西水南北  
四百步東西六十步臺池咸結石爲之詩所謂思樂泮  
水也沂水又西逕圓邱北邱高四丈餘沂水又西流昔

韓雉射龍於斯水之上尸子曰韓雉見申羊於魯有龍  
飲於沂韓雉曰吾聞之出見虎搏之見龍射之今弗射  
是不得行吾聞也遂射之沂水又西右注泗水者也

又西過瑕邱縣東屈從縣東南流瀟水從東來注之

瑕邱魯邑春秋之負瑕矣哀公七年季康子伐邾囚諸  
負瑕是也應劭曰瑕邱在縣西南昔衛大夫公叔文子  
升於瑕邱蘧伯玉從文子曰樂哉斯邱死則我欲葬焉  
伯玉曰吾子樂之則瑗請前刺其欲害民良田也瑕邱  
之名蓋因斯以表稱矣曾子弔諸負夏鄭元皇甫謐並  
言衛地魯衛雖殊土則一也

卮林曰縣邑同號地志已  
多于時魯有瑕邱何知衛



九經三傳卷之四十一  
七

無茲壘周之典制國有分士行李所過聚糧是防若瑕邱獨為魯田寸壤皆非衛有未聞衛命介使憑覽敵國之墟而終沒大夫卜窆強鄰之陌者也且此處所敘咸在邾魯封域忽入衛事于理殊乖又負夏可為負瑕則虞舜所遷豈亦在是乎一清按衛瑕邱在今開州東南三十里秦置濮陽郡即衛之帝邱成公自楚邱來遷者也公叔之云宜在彼地道元誤

和帝永甯九年封馬光子復為侯國一清按此注皆誤據范史云永初七年復紹封光子朗為合鄉侯則復非其名且事在安帝

永初七年非和帝永甯九年永甯亦安帝紀年次年之

七月即改建元元年其水西南流入邾春秋哀公二年季孫斯伐

邾取瀛東田及沂西田是也瀛水又逕魯國鄒山東南

而西南流春秋左傳所謂嶧山也邾文公之所遷今城

在鄒山之陽依巖咀以墉固故邾婁之國曹姓也叔梁

紇之邑也孔子生於此後乃縣之因鄒山之名以氏縣也

全氏曰以鄒為鄒則孔子乃邾婁國人耶善長可謂大繆矣王莽之鄒亭矣京相璠曰地理志嶧山在鄒縣北一清按漢志作駟縣繹邑之所依以為名也山東西二十里高秀獨出積石相臨殆無土壤石間多孔穴洞達相通往往有如數間屋處其俗謂之嶧孔遭亂輒將處人入嶧外寇雖眾無所施害晉永嘉中太尉郗鑒將鄉曲保此山胡賊攻守不能得今山南有大嶧名曰邾公嶧山北有絕巖秦始皇觀禮於魯登於嶧山之上命丞相李斯以大篆勒銘山頂名曰書門詩所謂保有鳧嶧者也瀛水又西南逕蕃縣故城南又

水逕桂陽



西逕薛縣故城北地理志曰夏車正奚仲之國也竹書紀年梁惠成王三十一年邳遷于薛改名徐州城南山上有奚仲冢晉太康地記奚仲冢在城南二十五里山上百姓謂之神靈也齊封田文於此號孟嘗君有惠譽今郭側猶有文冢結石爲郭作制嚴固瑩麗可尋行人往還莫不逕觀以爲異見矣澗水又西逕仲虺城北晉太康地記曰奚仲遷於邳仲虺居之以爲湯左相其後當周爵稱侯後見侵削霸者所緝爲伯任姓也應劭曰邳在薛徐廣史記音義曰楚元王子邳客以呂后二年封上邳侯也有下故此爲上矣晉書地道記曰仲虺城

在薛城西三十里澗水又西至湖陸縣入于泗故京相璠曰薛縣澗水首受蕃縣西注山陽湖陸是也經言瑕邱東誤耳

### 又南過平陽縣西

縣卽山陽郡之南平陽縣也竹書紀年曰梁惠成王二十九年齊田辟及宋人伐我東鄙圍平陽者也王莽改之曰暉平矣泗水又南逕故城西世謂之漆鄉應劭十三州記曰漆鄉邾邑也杜預曰平陽東北有漆鄉郭今見有故城西南方二里所未詳也

### 又南過高平縣西洸水從西北來流注之

水經注釋

卷二十五

九



泗水南逕高平山山東西十里南北五里高四里與眾山

相連其山最高頂上方平故謂之高平山縣亦取名焉

泗水又南逕高平縣故城西漢宣帝地節三年封丞相

魏相為侯國全氏曰姜宸英曰此二句是後人所妄加蓋善長既知高平是王莽所改則魏相所

封非此高平明矣豈尚引之乎何焯曰弱翁所封蓋臨淮之高平地志注曰侯國者也予按漢表高平屬柘柘

是淮陽之屬縣也一清按今高帝八年封將軍陳錯為

橐侯全氏曰按八年當作七年陳錯漢表作陳錯沈氏

是橐矣臣瓚曰音括然師古註漢表讀作公老翻是唐

人已誤橐為橐矣一清按郡國志亦作橐東平憲王傳

仍是橐字橐之與橐未能一定甯得據志以駁表乎地理志曰縣故山陽之橐也

全氏曰按漢志無是文王莽改曰高平應劭曰章帝改按本志曰

王莽更名章帝因之矣所謂洸水者洙水也蓋洸洙相入互受通稱矣

又南過方與縣東

漢哀帝建平四年縣女子田無嗇生子先未生二月兒啼腹中及生不舉葬之陌上三日人過聞啼聲母掘養之

之

荷水從西來注之

荷水即沛水之所苞注以成湖澤也而東與泗水合於

湖陵縣西六十里穀庭城下俗謂之黃水口黃水西北

通巨野澤蓋以黃水沿注于荷故因以名焉禹貢錐指曰地記之



言水也凡二水大小相敵既合流自下皆得通稱多至五六水亦然漢志魯國沂縣泗水至方與入沛說文泗受沛水東入淮其所謂沛即沛水也又漢志蕃縣南梁水西至湖陵入沛渠酈善長云沛在湖陸西而左注泗泗沛合流地記或言沛入泗泗亦言入沛故有入沛之文按觀魚臺下臨沛水而公羊傳以棠為濟上邑則以沛為濟漢初已故班固謂泗入濟許慎謂泗受濟而不言沛以沛即濟也水經濟水篇所敘自乘氏以至湖陸即分濟之沛自沛縣以至睢陵即入淮之泗而皆以爲濟水蓋本漢志以立文也然又云濟水東至乘氏縣西分爲二南爲沛水北爲濟瀆而泗水篇則自方與受沛以至睢陵入淮皆以爲泗水是又與禹貢合水經非一時一手作觀于此而益驗竊謂濟雖小水而能專達于海故得與四瀆之列使合泗入淮者亦濟則是因淮以達海矣安得謂之瀆禹主名山川不相假借而後世地記以沛泗爲濟本支不分大戾經旨不詳辨之何以使禹貢之書著明如日月哉

又屈東南過湖陸縣南涓涓水從東北來流注之

地理志曰故湖陵縣也沛水在南王莽更曰湖陸應劭

曰尙書一名湖陵章帝封東平王蒼子爲湖陵侯更名

湖陵也一清按此注全是襲用漢志而又誤者漢志山陽郡湖陵縣下云禹貢浮于淮泗通于河水在

南莽曰湖陸應劭曰尙書一名湖章帝封東平王蒼子爲湖陵侯更名湖陵通于河據說文是達于沛一名湖

之湖亦當是沛字蓋仲瑗引尙書之沛以證世本漢書通于河之誤傳寫者更訛而爲湖道元不察又加陸字

遂有尙書一名湖陸之繆詞此酈氏之疎非應氏之過又按後漢書光武帝紀建武五年幸沛進幸湖陵則復

號不始于章帝抑或史家追書之詞耶更考郡國志山陽郡湖陸故湖陵章帝更名劉昭補註云前漢志王莽

改曰湖陸陸章帝復其號晉以後總泗水又東逕郟鑿所

曰湖陸經文陸字疑亦後人所改 築城北又東逕湖陵城東南昔桓溫之北入也范曄

慕容忠於此城東有度尙碑一清按隸釋有漢荊州刺史度尙碑尙字博平山陽



湖陸人威宗永康元年立洪适曰此碑在湖陸荒野野政和壬辰巡檢王當世見之始遷于官廨其後邑令滕君欲徙碑於沛舟三載而三覆繼因大水漲泗水又左會沒不出劉宗儀攝事乃能立之使星亭云

南梁水地理志曰水出蕃縣今縣之東北平澤出泉若輪焉發源成川西南流分爲二水北水枝出西逕蕃縣北又西逕滕城北春秋左傳隱公十一年滕侯薛侯來朝爭長薛侯曰我先封滕侯曰我周之卜正也薛庶姓也我不可以後之公使羽父請薛侯曰君辱在寡人周諺有之曰山有木工則度之賓有禮主則擇之周之宗盟異姓爲後寡人若朝於薛不敢與諸任齒君若辱貶寡人則願以滕君爲請薛侯許之乃長滕侯者也漢高

祖封夏侯嬰爲侯國號曰滕公全氏曰夏侯嬰嘗爲滕也嬰封汝陰善長誤矣鄧晨曰今沛郡公邱也其水又漑於邱焉

縣故城在滕西北城周二十里內有子城按地理志卽

滕也周懿王子錯叔繡文公所封也朱氏謀璋箋曰漢志沛郡公邱縣注

謂滕是周懿王子錯叔繡所封故注仍其說一清按顏師古亦云未詳其義蓋古傳記有之第文公字又未知所出齊滅之秦以爲縣漢武帝元朔三年封魯共王子

劉順爲侯國世以此水漑我良田遂及百秭故有兩溝之名焉南梁水自枝渠西南逕魯國蕃縣故城東俗以南鄰於鄗亦謂之西鄗水南梁水又屈逕城南應劭曰

縣古小邾邑也地理志曰其水西流注于沛一清按漢志魯國蕃



縣南梁水西至湖陵入沛渠沛當作沛沛在湖陸西而左注泗泗沛合流故地記或言沛入泗泗亦言入沛互受通稱故有入沛之名而有涓涓之稱疑卽是水也戴延之西征記亦言湖陸縣之東南有涓涓水亦無記於南梁謂是吳王所導之瀆也余按湖陸西南止有是水延之蓋以國語云吳王夫差起師將北會黃池掘溝於商魯之間北屬之沂西屬于沛以是言之故謂是水爲吳王所掘非也余以水路求之止是泗川耳蓋北達沂西北逕於商魯而接於沛吳所浚廣耳非謂起自東北受沂西南注沛也

泗水

三

泗水

假之有通非吳所趣年載誠眇人情厠近以今村古益知延之之不通情理矣泗水又南鄆水注之又逕薛之上邳城西而南注者也全氏曰前已言鄆水自湖陸入泗矣此又忽出鄆水逕上邳南

注泗之文不幾複與倘所謂西鄆水近是

### 又南過沛縣東

昔許由隱於沛澤卽是縣也縣蓋取澤爲名宋滅屬楚在泗水之濱於秦爲泗水郡治黃水注之黃水出小黃縣黃鄉黃溝國語曰吳子會諸侯于黃池者也黃水東流逕外黃縣故城南張晏曰魏郡有內黃縣故加外也薛瓚曰縣有黃溝故縣氏焉圈稱陳留風俗傳曰縣南



有渠水於春秋為宋之曲棘里故宋之別都矣春秋昭  
 公二十五年宋元公卒於曲棘是也宋華元居於稷里  
 宣公十五年楚鄭圍宋晉解揚一清按下有脫字楚圍致命于  
 此宋人懼使華元乘闖夜入楚師登子反之牀全氏曰乘闖是穀梁傳文登牀是左氏傳文善長合而成書曰寡君使元以病告敝邑易子  
 而食析骸以爨城下之盟所不能也子反退一舍宋楚  
 乃平今城東闔上猶有華元祠祠之不輟城北有華元  
 冢黃溝自城南東逕葵邱下春秋僖公九年齊桓公會  
 諸侯于葵邱宰孔曰齊侯不務德而勤遠略北伐山戎  
 南伐楚西為此會東略之不知西則否矣其在亂乎君

務靖亂無勤於行晉侯乃還即此地也黃溝又東注大

澤蒹葭莞葦生焉即世所謂大薺陂也陂水東北流逕

定陶縣南又東逕山陽郡成武縣之楚邱亭北一清按此即班

固誤以為衛文公所遷之楚邱而道元因之然分註云有楚邱亭則以成武本有此名耳乃春秋隱公七年戎伐凡伯之地詳見濟水注二黃溝又東逕成武縣故城南王莽更之

曰成安也黃溝又東北逕郟城北春秋桓公二年經書

取郟大鼎于宋戊申納于太廟左傳曰宋督攻孔父而

取其妻殺殤公而立公子馮以郟大鼎賂公臧僖伯清

按傳是哀伯此酈氏誤記諫為非禮十三州志曰今成武縣東南有郟城俗謂之北部者也黃溝又東逕平樂縣故城南又



水經注釋 泗水  
東右合泡水即豐水之上源也水上承大薺陂東逕貫城北又東逕已氏縣故城北王莽之已善也縣有伊尹冢崔駰曰殷帝沃丁之時伊尹卒葬于薄皇覽曰伊尹冢在濟陰已氏平利鄉皇甫謐曰伊尹年百餘歲而卒大霧三日沃丁葬以天子之禮親自臨喪以報大德焉又東逕孟諸澤杜預曰澤在梁國睢陽縣東北又東逕郟城縣故城南地理志曰山陽縣也王莽更名之曰告成矣故世有南郟北郟之論也又東逕單父縣故城南昔宓子賤之治也孔子使巫馬期觀政入其境見夜漁者問曰子得魚輒放何也曰小者吾大夫欲長育之故

也子聞之曰誠彼形此子賤得之善矣惜哉不齊所治者小也王莽更名斯縣為利父矣世祖建武十三年封劉茂為侯國又東逕平樂縣右合泡水水上承淮水於下邑縣界東北注一水上承淮水於杼秋縣界北流清按兩淮水俱是睢水之誤漢下邑縣在今河南歸德府夏邑縣西南睢水在縣東南漢杼秋縣在河南徐州府豐縣西七十五里睢水在縣南五十里蓋睢河自河南陳留縣東北分河水東南流逕商邱夏邑永城以達于江南之豐縣而下入徐宿二州二泡之水一于下邑分睢者獲水也一于杼秋分睢者穀水也而統謂之睢則以獲水與睢水合流入泗穀水亦入泗與睢水往復逕通互攝兼稱二泡下流乃有豐水之目可知淮字與睢形似世又謂之瓠盧溝水積為渚渚水東北流二渠雙引左合豐水俗謂之二泡也自下豐泡竝得通稱矣故



地理志曰平樂侯國也泡水所出又逕豐西澤謂之豐水漢書稱高祖送徒麗山徒多亡到豐西澤有大蛇當徑拔劍斬之此卽漢高祖斬蛇處也又東逕大堰水分爲二又東逕豐縣故城南王莽之吾豐也水側城東北流右合枝水上承豐西大堰派流東北逕豐城北東注豐水豐水又東合黃水時人謂之狂水蓋狂黃聲相近俗傳失實也自下黃水又兼通稱矣水上舊有梁謂之泡橋王智深宋史云宋太尉劉義恭於彭城遣軍主稭元敬北至城覘候魏軍魏軍於清西望見元敬士眾魏南康侯杜道儁引趣泡橋沛縣民逆燒泡橋又於林中

打鼓儁謂宋軍大至爭渡泡水水深酷寒凍溺死者殆

半清水卽泡水之別名也全氏曰濟水入汶謂之清水

所爭皆泗上之清水而非濟水也其地有曰清西則元嘉二十七年魏將拓跋建自清西屯蕭城曰清東則魏將步尼公自清東屯留城曰清南則天監五年梁將藍懷恭築城清南曰清中則永明三年齊角城戍主張蒲入清中是也宋沈攸之魏尉元齊周山圖所爭皆在其地以其爲泗水合睢水入淮之地故亦謂之睢清口秦始三年宋將陳顯達引兵入睢清口是也建元三年齊角城將李安民敗魏師于孫谿渚胡三省曰渚在清水之濱一清按泡水泡橋通鑑俱作苞字蓋文異耳沈約宋書稱魏軍欲渡清西非也一清按宋史索虜傳楚王樹洛眞南康侯杜道儁進軍清西至蕭城步尼公進軍清東至留城乃清東之軍既遇稭元敬還趨泡橋則自東而西今云魏軍欲渡清西似失當時形勢矣泡水又東逕沛縣故城南秦末兵起蕭何曹參迎漢祖於此城高帝



十一年封合陽侯劉仲子為侯國

一清按史漢表傳沛侯濞即高祖兄劉仲

之子後封城內有漢高祖廟廟有三碑後漢立廟基以

青石為之階陛尚存劉備之為徐州也治此袁術遣紀

靈攻備備求救呂布布救之屯小沛招靈請備共飲布

謂靈曰元德布弟也布性不熹合鬪但熹解鬪乃植戟

於門布彎弓曰觀布射戟小支中者當各解兵不中可

留決鬪一發中之遂解此即布射戟支處也述征記曰

城極大四周塹通豐水豐水於城南東注泗即泡水也

地理志曰泡水自平樂縣東北至沛入泗者也

一清按漢志山

陽郡平樂縣淮水東北至沛入泗道元兩引班書俱作泡水淮字誤明嘉靖年刊本尚作包字惟去水傍耳猶

可也泗水南逕小沛縣東縣治故城南坨上東岸有泗

水亭漢祖為泗水亭長即此亭也故亭今有高祖廟廟

前有碑延熹十年立廟闕崩禡略無全者水中有故石

梁處遺石尚存高祖之破黥布也過之置酒沛宮酒酣

歌舞慷慨傷懷曰遊子思故鄉也泗水又東南流逕廣

戚縣故城南漢武帝元朔元年封劉澤為侯國

全氏曰按善長

引史漢表之例王子侯必稱某王之名則此文當云魯共王子擇擇漢表作將今云澤亦誤也王莽更

之曰力聚也泗水又逕留縣而南逕坨城東城西南有

崇侯虎廟道淪遺愛不知何因而遠有此圖泗水又南

逕宋大夫桓魋冢西山枕泗水西上盡石鑿而為冢今



人謂之石郭者也郭有二重石作工巧夫子以為不如死之速朽也

又東南過彭城縣東北

泗水西有龍華寺是沙門釋法顯遠出西域浮海東還持龍華圖首創此制法流中夏自法顯始也其所持天竺二石仍在南陸東基堪中其石尚光潔可愛泗水又

南淮水入焉而南逕彭城縣故城東一清按泗水于下淮陰入淮所謂淮泗之會即角城也彭城之境未為淮水所逕疑是淮水之誤杜元凱所謂睢水首受汴渠東經陳留梁譙沛

彭城入泗者也周顯王四十二年九鼎淪沒泗淵秦始皇時而鼎見於斯水始皇自以德合三代大熹使數千人沒水

求之不得所謂鼎伏也亦云系而行之未出龍齒齧斷其系故語曰稱樂大早絕鼎系當是孟浪之傳耳全氏曰按

周鼎何以過彭城而沒泗水李復疑之舊矣且赧王五十九年而亡次年秦始皇取九鼎見于周本紀上距顯王四十二年乃惠文王之十一年顯王又六年而崩間以慎觀王六年至赧王之五年乃武王之元年其八年武王薨據甘茂傳武王葬周蓋舉鼎絕臚而死則是時鼎猶未入泗又歷五十一而九鼎始不保以道里計之浮河入渭即至秦土豈由泗乎又況在六十二年之前也其妄明矣史記封禪書又謂宋太邱社亡而鼎沒泗水是周鼎早在宋也夫周鼎何以在宋太邱之社更不可曉矣且使果然則事在顯王三十三年又前乎此亦非四十二年又秦始皇紀是祠泗水以求鼎非鼎見也張守節曰赧王十九年秦昭王取九鼎其一飛入泗水其八入秦是泗水又逕龔勝墓南墓碣尚存又逕亞父冢東皇覽曰亞父冢在廬江縣郭東居巢亭中有亞父



井吏民親事皆祭亞父於居巢廳上後更造祠于郭東至今祠之按漢書項羽傳歷陽人范增未至彭城而發疽死不言之居巢今彭城南有項羽涼馬臺臺之西南山麓上即其冢也增不慕范蠡之舉而自絕於斯可謂褊矣推考書事墓近於此也

又東南過呂縣南

呂宋邑也春秋襄公元年晉師伐鄭及陳楚子辛救鄭侵宋呂留是也縣對泗水漢景帝三年有白頸烏與黑烏羣鬪於縣白頸烏不勝墮泗水中死者數千京房易傳曰逆親親厥妖白黑烏鬪時有吳楚之反泗水之上

有石梁焉故曰呂梁也昔宋景公以弓工之弓彎弧東射矢集彭城之東飲羽於石梁即斯梁也懸濤瀟澗實為泗嶮孔子所謂魚鼈不能游又云懸水三十仞流沫

九十里今則不能也蓋惟嶽之喻未便極天明矣一清按呂

梁洪之險道元時已不能如古矣至明嘉靖二十三年管河主事陳洪範惡其石破害運船鑿之使平而禹迹蕩然無存矣晉太康地記曰水出磬石書所謂泗濱浮磬者

也泗水又東南流丁溪水注之溪水上承泗水於呂縣東南流北帶廣隰山高而注于泗川泗水冬春淺澀常排沙通道是以行者多從此溪即陸機行思賦所云乘丁水之捷岸排泗川之積沙者也晉太元九年左將軍



謝元於呂梁遣督護聞人甌用工九萬擁水立七埭以利漕運

又東南過下邳縣西

泗水歷縣逕葛嶧山東

一清按漢志東海郡下邳縣即葛嶧山在西古文以為嶧易即

奚仲所遷邳嶧者也泗水又東南逕下邳縣故城西東

南流沂水流注焉故東海屬縣也應劭曰奚仲自薛徙

居之故曰下邳也漢徙齊王韓信為楚王都之後乃縣

焉王莽之閏儉矣東陽郡治文穎曰秦嘉東陽郡人今

下邳是也晉灼曰東陽縣本屬臨淮郡明帝分屬下邳

後分屬廣陵故張晏曰東陽郡今廣陵郡也漢明帝置

下邳郡矣

一清按漢書高帝紀云東陽甯君秦嘉立景駒為楚王註引文穎曰秦嘉東陽郡人為甯

縣君晉灼曰東陽縣也臣瓚曰陳勝傳云凌人秦嘉然

則嘉非東陽人嘉初起於郟號大司馬又不為甯縣君

東陽甯君自一人秦嘉又一人史記項籍本城有三重

紀裴駟集解引陳涉世家云秦嘉廣陵人

其大城中有大司馬石苞鎮東將軍胡質司徒王渾監

軍石崇四碑南門謂之白門魏武擒陳宮于此處矣

厄守也小城晉中興北中郎將荀羨郗曇所治也昔太山

吳伯武少孤與弟文章相失二十餘年遇于縣市文章

欲歐伯武心神悲痛因相尋問乃兄弟也縣為沂泗之

會也又有武原水注之水出彭城武原縣西北會注陂



南逕其城西王莽之和樂亭也縣東有徐廟山山因徐

徙卽以名之也山上有石室徐廟也武原水又南合武

水謂之泐水全氏曰漢志太山郡南武陽縣冠石山治

南入泗水經注則以爲泐水而不云出冠石山至沂水

篇注云治水出南武陽之冠石山顧不云入泗而云入

沂其舛南逕剛亭城又南至下邳入泗謂之武原水口

也又有桐水一清按漢志作桐水出西北東海容邱縣東南至下

邳入泗泗水東南逕下相縣故城東王莽之從德也城

之西北有漢太尉陳球墓墓前三碑是弟子管甯華

歆等所造金石錄目錄百四十九漢太尉陳球碑光和

碑陰隸釋跋曰水經云下邳陳球墓前有三碑是弟子

管甯華歆等造此所見皆故吏故民而無管華姓名豈

與劉寬碑相類其一則弟子所立乎又云陳公兩碑皆

在淮陽莫識爲先後趙氏但有一碑陰而水經謂墓前

有三碑似亦指碑陰爲一碑也一清按洪景伯之言非

也鄭注明云墓前有三碑弟子管甯華歆等所造今隸

釋所載二碑皆無管華姓名則弟子所立一碑已

亡故金石錄僅有二碑而乃以碑陰充數何耶初平

四年曹操攻徐州破之拔取慮睢陵夏邱等縣以其父

避難被害於此屠其男女十萬泗水爲之不流自是數

縣人無行跡亦爲暴矣泗水又東南得睢水口泗水又

逕宿預城之西又逕其城南故下邳之宿留縣也王莽

更名之曰康義矣全氏曰水經注引漢志有爲今書所

無者或是闕文然亦有絕非闕文而

出于酈氏之妄者西京無下邳郡下邳東海郡之屬縣

耳安得下邳郡有宿留縣乎本無此縣又何以云王莽

更名之曰康義乎一清按宿預故城在今邳州宿遷縣

東南漢臨淮郡公猶縣之境也東漢省晉義熙中置宿

遷縣

水經注釋 卷二十五

三



水經注釋泗水

預縣班志云猶縣下云莽曰秉義康秉字形相似道元引之蓋實宿預之即云猶也而不著云猶之名是其疎略之過如以為造晉元皇之為安東也督運軍儲而為作無端則太甚矣

邸閣也魏太和中南徐州治後省為戍梁將張惠紹北入水軍所次馮固斯城更增修廓塹其四面引水環之今城在泗水之中也

又東南入于淮

泗水又東逕凌柵南西征記曰舊凌縣之治也泗水又東南逕淮陽城北城臨泗水昔菑邱訢飲馬斬蛟眇目於此處也泗水又東南逕魏陽城北城枕泗川陸機行思賦曰行魏陽之枉渚故無魏陽疑即泗陽縣故城也

王莽之所謂淮平亭矣蓋魏文帝幸廣陵所由或因變之未詳也泗水又東逕角城北而東南流注于淮考諸地說或言泗水于睢陵入淮亦云于下相入淮皆非實錄也

沂水出泰山蓋縣艾山

鄭元云出沂山亦或云臨樂山水有二源南源所導世謂之柞泉北水所發俗謂之魚窮泉俱東南流合成一川右會洛預水水出洛預山東北流注之沂水東南流左合桑預水水北出桑預山東流注于沂沂水又東南螳蜋水入焉水出魯山東南流右注沂沂水又東逕蓋



縣故城南東會連綿之水水發連綿山南流逕蓋城東而南入沂沂水又東逕浮來之山春秋經書公及莒人盟于浮來者也即公來山也在邳鄉西故號曰邳來之間也浮來之水注之其水左控三川右會甘水而注于沂沂水又南逕爆山西山有二峯相去一里雙巒齊秀員峙若一沂水又東南逕東莞縣故城西與小沂水合孟康曰縣故鄆邑今鄆亭是也漢武帝元朔二年封城陽共王子吉為東莞侯魏文帝黃初中立為東莞郡東燕錄謂之團城劉武帝北伐廣固登之以望五龍魏南青州治左氏傳曰莒魯爭鄆為日久矣今城北鄆亭是

也全氏曰按十三州志曰有東西二鄆魯昭公所居為西鄆在兗州東平郡莒魯所爭為東鄆此邑是也亦即汶陽之田所謂鄆 京相璠曰瑯琊姑幕縣南四十里

員亭故魯鄆邑世變其字非也郡國志東莞有鄆亭今在團城東北四十里猶謂之故東莞城矣小沂水出黃孤山西南流逕其城北西南注于沂沂水又南與濶山水合水出濶山東南流右佩二水總歸于沂沂水南逕東安縣故城東而南合時密水水出時密山春秋時莒地左氏傳莒人歸共仲于魯及密而死是也時密水東流逕東安城南漢封魯孝王子強為東安侯

帝甘露四年封時密水又東南流入沂沂水又南桑泉水北出

一清按漢表疆以宣



五女山東南流巨圍水注之水出巨圍之山東南注于桑泉水桑泉水又東南堂阜水入焉其水導源堂阜春秋莊公九年管仲請囚鮑叔受之及堂阜而稅之杜預曰東莞蒙陰縣西北有夷吾亭者是也堂阜水又東南注桑泉水桑泉水又東南逕蒙陰縣故城北王莽之蒙恩也又東南與雙崗水合水有二源雙會東導一川俗謂之汶水也一清按此又一汶非入沛及入濰之水于欽以爲齊有三汶是已東逕蒙陰縣注桑泉水又東南盧川水注之全氏曰按漢志太北王國都也城陽國有盧縣卽是注所云盧川水者也盧爲周禮職方兗州浸之一班氏遺之師古則曰盧水在濟北盧縣今考太山之盧縣無盧水而城陽乃有之得毋師古偶誤以城陽爲濟北耶又瑯琊郡橫縣亦有

盧水入濰然其源流似遜于城陽之盧竊謂師古所指爲城陽無疑也今本漢書城陽之盧作慮字慮有盧音如昌慮取水出鹿嶺山東南流左則二川臻湊右則諸葛泉源斯奔亂流逕城陽之盧縣故蓋縣之盧上里也

漢武帝元朔二年封城陽共王子劉稀爲侯國一清按漢表作雷侯稀此從史表鄭康成破周禮雷雝爲盧維雷盧字通用又本表以爲東海而注以爲城陽王莽更名之曰著善矣又東南注于桑泉水桑泉水又東南右合蒙陰水水出蒙山之陰東北流昔瑯琊承宮避亂此山立性好仁不與物競人有認其黍者捨之而去其水東北流入沂沂水又南逕陽都縣故城東縣故陽國也齊同盟齊利其地而遷之者也漢高帝六年封將軍丁



復為侯國沂水又南與蒙山水合水出蒙山之陰東流逕陽都縣南東注沂水沂水又左合溫水水上承溫泉陂而西南入于沂水者也

南過瑯邪臨沂縣東又南過開陽縣東

沂水南逕中邱城西春秋隱公七年夏城中邱左傳曰書不時也沂水又南逕臨沂縣故城東郡國志曰瑯邪有臨沂縣故屬東海郡有治水注之水出太山南武陽縣之冠石山地理志曰冠石山治水所出應劭地理風俗記曰武水出焉蓋水異名也東流逕蒙山下有祠清按漢志太山郡有蒙陰縣禹貢之蒙山即在其西南有祠

郡國志曰縣有顓臾城季氏將伐之孔子曰昔者先王以為東蒙主社稷之臣也何以伐為冉有曰今夫顓臾固而便近於費者也治水又東南流逕費縣故城南地理志東海之屬縣也為魯季孫之邑子路將墮之公山弗擾師襲魯弗克後季氏為陽虎所執弗擾以費畔即此邑也漢高帝六年封陳賀為侯國王莽更名之曰順從也許慎說文云沂水出東海費縣東西入泗從水斤聲呂忱字林亦言是矣斯水東南所注者沂水在西不得言東南趣也皆為繆矣故世俗謂此水為小沂水治水又東南逕祊城南春秋隱公八年鄭伯請釋泰山之



祀而祀周公使宛歸泰山之祊而易許田杜預釋地曰

祊鄭祀泰山之邑也在瑯邪費縣東南治水又東南流

注于沂一清按善長既引漢志以為治水為出南武陽

篇有武水云至下邳入泗而其出不云南武陽之冠石

山乃云武原水又南合武水謂之泲水已耳此注敘治

水于臨沂之下殆因漢志東萊曲成縣出陽邱山之治

有二東南入沂西入泗蓋泗沂交會之處故有此繆

今按西入宿遷境今為運道其流甚盛而東泲河源出

費縣山中或云出榜山之治水無疑總

與東萊曲成出陽邱山之治水無與也

沂水又南逕開

陽縣故城東縣故郟國也春秋左傳昭公十八年邾人

襲郟盡俘以歸郟子曰余無歸矣從帑于邾是也後更

名開陽矣春秋哀公三年經書季孫斯叔孫州仇帥師

城啟陽者是矣縣故瑯邪郡治也

又東過襄賁縣東屈從縣西南流又屈南過郯縣西

魯連子稱陸子謂齊潛王曰魯費之衆臣甲舍于襄賁

者也王莽更名章信也郯故國也少昊之後春秋昭公

十七年郊子朝魯公與之宴昭子叔孫婁一清按三問

曰少昊鳥名官何也郊子曰吾祖也我知之黃帝炎帝

以雲火紀官太皞以龍紀少皞瑞鳳鳥統歷鳥官之司

議政斯在孔子從而學焉既而告人曰天子失官學在

四夷者也竹書紀年晉烈公四年一清按竹書是晉烈

公六年當周威烈王

水經注卷之二十一

水經注卷之二十一



之十 越子朱句滅郟以郟子鵠歸縣故舊魯也東海郡  
治秦始皇以為郟郡漢高帝二年更從今名全氏曰接  
而秦已有東海郡治郟史記陳涉世家云 郟非秦郡  
圍東海守慶于郟是也此蓋承應劭之誤 卽王莽之沂  
平者也

又南過良城縣西又南過下邳縣西南入于泗

春秋左傳曰昭公十三年秋晉侯會吳子于良吳子辭  
水道不可以行晉乃還是也地理志曰良城王莽更名  
承翰矣沂水於下邳縣北西流分爲二水一水於城北  
西南入泗一水逕城東屈從縣南亦注泗謂之小沂水  
水上有橋徐泗間以為圯昔張子房遇黃石公于圯上

卽此處也建安二年曹操圍呂布於此引沂泗灌城而  
擒之

洙水出泰山蓋縣臨樂山

地理志曰臨樂山洙水所出西北至蓋入泗水或作池

字蓋字誤也一清按八 洙水自山西北逕蓋縣漢景帝

中五年封后兄王信爲侯國又西逕泰山東平陽縣春  
秋宣公八年冬城平陽杜預曰今泰山平陽縣是也河  
東有平陽故此加東矣晉武帝元康九年改爲新泰縣  
也

西南至卞縣入于泗

水經注

卷二十五



洙水西南流盜泉水注之泉出卞城東北卞山之陰尸  
子曰孔子至于勝母暮矣而不宿于盜泉渴矣而不飲  
惡其名也故論撰考識曰水名盜泉仲尼不漱卽斯泉  
矣西北流注于洙水洙水又西南流于卞城西而與泗  
水亂流西南至魯縣東北又分爲二水水側有故城兩  
水之分會也洙水西北流逕孔里北是謂洙泗之間矣  
春秋之浚洙非謂始導矣蓋深廣之耳洙水又西南枝  
津出焉又南逕瑕邱城東而南入石門門右結石爲水  
門跨於水上也西南流世謂之杜武溝洙水又西南逕  
南平陽縣之顯閭亭西邾邑也春秋襄公二十一年經

書邾庶其以漆閭邱來奔者也杜預曰平陽北有顯閭  
亭十三州記曰山陽南平陽縣又有閭邱鄉從征記曰  
杜謂顯閭邱也今按漆鄉在縣東北漆鄉東北十里見  
有閭邱鄉顯閭非也然則顯閭自是別亭未知孰是又  
南洙水注之呂忱曰洙水出東平陽上承汶水於岡縣  
西闡亭東爾雅曰汶別爲闡其由洛之有波矣洙水西  
南流逕盛鄉城西京相璠曰岡縣西南有盛鄉城者也  
又南逕泰山甯陽縣故城西漢武帝元朔三年封魯共  
王子劉恬爲侯國一清按史表恬作恢索隱曰表在濟南今漢表無濟南字地理志泰山郡甯陽縣是也王莽改之曰甯順也又南洙水枝津注之水



首受洸水西南流逕瑕邱城北又西逕甯陽城南又西南入于洸水洸水又西南逕泰山郡乘邱縣故城東趙

肅侯二十年韓將舉與齊魏戰于乘邱一清按史記趙世家肅侯二十

三年韓舉與齊魏戰死于桑邱裴駰集解引地理志云

秦山有桑邱縣今漢志是桑邱桑字相引致訛又

韓世家宣惠王八年魏敗我將韓舉六國年表同韓宣

惠王之八年乃周烈王之四十四年實趙武靈王之元

年也去肅侯之二十三年事隔兩朝年歷三週舉為趙

將前已敗死又復為韓將以與魏戰可怪也是以徐廣

曰韓將夫韓將而何以書于趙世家乎索隱曰舉是韓

將而紀年云趙將蓋舉本趙將後入韓此亦為史遷作

調人耳考之紀年則不合當周威烈王之十六年正

晉烈公之十年齊田辟與邯鄲韓舉戰于平邑獲韓舉

然則舉是趙將稍可據其時韓武子趙獻侯田齊宣公

耳年數相去八十六年之久舛錯如此索隱引紀年云

其敗當韓威王八年是即此縣也漢武帝元朔五年封

不同也而韓又無威王即此縣也漢武帝元朔五年封

中山靖王子劉將夜為侯國也

一清按史表作桑邱侯

表作乘邱無深澤字蓋桑葉字相似然中山之封何以

在魯宋之郊蓋善長所見之漢書已脫誤矣今直隸安

肅縣西南有桑邱城安肅本漢中山國北

新城地將夜之封宜在彼而此則非也

洸水又東南

流注于洸水又南至高平縣南入于泗水西有茅鄉

城東去高平三十里京相璠曰今高平縣西三十里有

故茅鄉城者也



水經注釋卷二十五終

水經注釋卷二十五終

海甯錢保塘  
華陽吳祖椿  
覆校

水經注釋卷二十六

仁和趙一清誠夫錄

泲水

巨洋水

淄水

汶水

濰水

膠水

泲水出琅邪東莞縣西北山

大弁山與小太山連麓而異名也引控眾流積以成川

東南流逕邳鄉南南去縣八十許里城有三面而不周

於南故俗謂之半城泲水又東南流左合峴水水北出

大峴山東南流逕邳鄉東東南流注于泲水也

東南過其縣東

水經注釋卷二十六



水經注卷之二十一 流水  
流水左與箕山之水合水出東諸城西箕山劉澄之以  
爲許由之所隱也更爲巨謬矣其水西南流注于流水  
也

又東南過莒縣東

地理志曰莒子之國盈姓也少昊後列女傳曰齊人杞  
梁殖襲莒戰死其妻將赴之道逢齊桓公朱氏謀埤箋曰列女傳作莊公此云桓公字之譌也公將弔之杞梁妻曰如殖死有罪君何辱  
命焉如殖無罪有先人之弊廬在下妾不敢與郊弔公  
旋車弔諸室妻乃哭於城下七日而城崩故琴操云殖  
死妻援琴作歌曰樂莫樂兮新相知悲莫悲兮生別離

哀感皇天城爲之隳卽是城也其城三重並悉崇峻唯  
南開一門內城方十二里郭周四十許里尸子曰莒君  
好鬼巫而國亡無知之難小白奔焉樂毅攻齊守嶮全  
國秦始皇縣之漢興以爲城陽國封朱虛侯章治莒王  
莽之莒陵也光武合城陽國爲琅邪國以封皇子京雅  
好宮室窮極伎巧壁帶飾以金銀明帝時朱氏謀埤箋曰後漢書是章帝此云明帝字誤京不安莒移治開陽矣流水又南袁公水東  
出清山尋坤維而注流流水又南潯水注之水出於巨  
公之山西南流舊場以溉渚田東西二十里南北十五  
里潯水又西南流入流流水又南與葛陂水會水發三



柱山西南流逕辟城南世謂之辟陽城史記建元以來

王子侯者年表曰漢武帝元朔二年封城陽共王子節

侯劉壯為侯國也全氏曰索隱以為屬東海而善長曰城陽此從史表其水於邑

積以為陂謂之辟陽湖西南流注于泲水也

又南過陽都縣東入于沂

泲水自陽都縣又南會武陽溝水水東出倉山山上有

故城世謂之監官城非也即古有利城矣漢武帝元朔

四年封城陽共王子劉釘為侯國也全氏曰按本表曰東海而善長以為

陽其城因山為基水導山下西北流謂之武陽溝又西

至即邱縣注于泲泲水又南逕東海郡即邱縣故春秋

之祝邱也桓公五年經書齊侯鄭伯如紀城祝邱左傳

齊鄭朝紀欲襲之漢立為縣王莽更之曰就信也郡國

志曰自東海分屬琅邪闕駟曰即祝魯之音蓋字承讀

變矣泲水又南逕東海厚邱縣王莽更名之曰祝其亭

也分為二瀆西南出今無水世謂之枯流一瀆南逕建

陵縣故城東漢景帝八年封衛綰為侯國一清按史漢表俱云景帝

六年侯注云八年誤也王莽更之曰付亭也泲水又南逕建陵山

西魏正光中齊王之鎮徐州也立大塢遏水西流兩瀆

之會置城防之曰曲流戍自戍流三十里西注泲水舊

瀆謂之新渠自厚邱西南出左會新渠南入淮陽宿預



縣注泗水地理志所謂至下邳注泗者也經言於陽都  
入沂非矣流水左瀆自大堰水斷故瀆東南出桑堰水  
注之水出襄賁縣泉流東注流瀆又南左合橫溝水水  
發瀆右東入流水故瀆又南暨於竭其水西南流逕司吾  
山東又逕司吾縣故城西春秋左傳楚執鍾吾子以爲  
司吾縣王莽更之曰息吾也又西南至宿預注泗水也  
流水故瀆自下堰東南逕司吾城東又東南歷柎口城  
中柎水出於楚之柎地春秋襄公十年經書公與晉及  
諸侯會吳于柎京相璠曰宋地今彭城偃陽縣西北有  
柎水溝去偃陽八十里東南流逕偃陽縣故城東北地

理志曰故偃陽國也

一清按漢志楚國傳陽縣故偃陽國蓋以傳偃字異故班固申明之

續志亦以爲傳陽而劉昭又引左氏傳及杜預註以實之今注直改傳陽作偃陽也春秋左傳襄

公十年夏四月戊午會于柎晉荀偃士句請伐偃陽而  
封宋向戌焉荀偃曰城小而固勝之不武弗勝爲笑固  
請丙寅圍之弗克孟氏之臣秦董父輦重如役偃陽人  
啟門諸侯之士門焉縣門發郟人紇扶之以出門者狄  
虎彌建大車之輪而蒙之以甲以爲櫓左執之右拔戟  
以成一隊孟獻子曰詩所謂有力如虎者也主人縣布  
董父登之及堞而絕之墜則又縣之蘇而復上者三主  
人辭焉乃退帶其斷以徇于軍三日諸侯之師久于偃



陽請歸智伯怒曰七日不克爾乎取之以謝罪也荀偃  
士句攻之親受矢石遂滅之以偃陽子歸獻于武宮謂  
之夷俘偃陽妘姓也漢以為縣漢武帝元朔三年封齊孝  
王子劉就為侯國王莽更之曰輔陽也郡國志曰偃陽  
有柎水柎水西南亂于沂而注于流謂之柎口城得其  
名矣東南至胸縣入游注海也

巨洋水出朱虛縣泰山北過其縣西

泰山即東小泰山也巨洋水即國語所謂具水矣袁宏  
謂之巨昧王韶之以為巨菽亦或曰胸瀾皆一水也而  
廣其目焉一清按胸瀾之瀾亦作泐元史王磐傳李璵  
素重磐以禮延致之磐亦樂青州風土乃買

泐河之上題其居曰鹿菴即胸瀾水也其水北流逕朱虛縣故城西漢惠

帝二年封齊悼惠王子劉章為侯國一清按史表章地

理風俗記曰丹山在西南丹水所出東入海丹水由朱

虛邱阜矣故言朱虛城西有長坂遠峻名為破車峴城

東北二十里有丹山世謂之凡山縣在西南非山也丹

凡字相類音從字變也一清按丹古篆作凡故與凡相似丹水有二源

各導一山世謂之東丹西丹水也西丹水自凡山北流

逕劇縣故城東丹水注之水出方山山有三水一水

即東丹水也北逕縣台西丹水而亂流又東北出逕洧

薄澗北洧水亦出方山流入平壽縣積而為渚水盛則



北注東南流屈而東北流逕平壽縣故城西而北入丹水謂之魚合口丹水又東北逕望海臺東北注海蓋

亦縣所氏者也

一清按漢志北海郡平望縣侯國續志無之蓋東京省范史和熹鄧后紀有平

望侯劉毅章懷注云平望縣屬北海郡今青州北海縣西北平望臺是也一名望海臺注無平望之目而云蓋亦縣所氏可為疎鹵矣亦見此篇注尾

又北逕臨朐縣東

巨洋水自朱虛北入臨朐縣熏冶泉水注之水出西谿飛泉側瀨於窳坎之下泉谿之上原麓之側有一祠目之為冶泉祠按廣雅金神謂之清明斯地蓋古冶官所在故水取稱焉水色澄明而清冷特異淵無潛石淺鏤

沙文中古壇參差相對後人微加功飾以為嬉遊之

處南北邃岸凌空疎木交合先公以太和中作鎮海岱

余總角之年侍節東州至若炎夏火流閒居倦想提琴

命友嬉娛永日桂筍尋波輕林委浪琴歌既洽懽情亦

暢是焉棲寄實可憑衿小東有一湖佳饒鮮筍匪直芳

齊芍藥實亦潔並飛鱗其水東北流入巨洋謂之薰冶

泉又逕臨朐縣故城東城古伯氏駢邑也漢武帝元朔二

年封菑川懿王子劉奴為侯國

一清按索隱曰表在東海考漢志東海有朐臨

朐屬齊郡東萊亦有之然則未知東海是東萊之誤抑臨朐乃朐縣之訛也應劭曰臨朐山名也一清按朐是山名又是水名縣名臨朐以城臨側之故耳漢志注引應劭曰臨朐山謂臨側朐山也



非以臨胸爲山之故縣氏之胸亦水名其城側川臨胸  
名也善長誤矣是以王莽用表厥稱焉一清按漢志齊郡臨胸縣莽曰  
厥稱竊其城上下沿水悉是劉武皇北伐廣固營壘所  
在矣巨洋水又東北逕委粟山東孤阜秀立形若委粟  
又東北洋水注之水西出石膏山西北石澗口東南逕  
逢山祠西洋水又東南歷逢山下卽石膏山也山麓三  
成壁立直上山上有石鼓鳴則年凶郭緣生續述征記  
曰逢山在廣固南三十里有祠并石鼓齊地將亂石人  
輒打石鼓聲聞數十里洋水歷其陰而東北流世謂之  
石溝水東北流出於委粟山北而東注于巨洋謂之石

溝口然是水下流亦有時通塞及其春夏水泛川瀾無  
輟亦或謂之爲龍泉水地理志石膏山洋水所出是也  
今於此縣唯是瀆當之似符羣證矣洋水又東北得邳  
泉口泉源西出平地東流注于巨洋巨洋水又北會建  
德水水西發逢山阜而東流入巨洋水也

又北過劇縣西

巨洋水又東北合康浪水水發縣西南嶼山無事樹木  
而員峭孤峙巘岼分立左思齊都賦曰嶼嶺鎮其左是  
也康浪水北流注于巨洋巨洋水又東北逕劇縣故城  
西古紀國也春秋莊公四年紀侯不能下齊以與弟季

水經注釋

卷二十六

七



大去其國違齊難也後改曰劇故魯連子曰胸劇之人

辯者也漢文帝十八年別為菑川國後并北海一清按郡國志

云北海國建武十三年省菑川高密膠東三國以其縣屬但前漢志菑川有劇北海亦有之此是菑川之劇非

北海之劇也漢武帝元朔二年封菑川懿王子劉錯為侯國

王莽更之曰俞縣也一清按漢志菑川首劇自是王國都

不應以封王子班固于此縣下但曰莽曰俞而北海之劇註云侯國疑錯所封在北海善長混而一之非矣菑川國治之劇在壽光縣東南三

里亦曰劇南城春秋時紀國地城內有臺俗曰紀臺城者是北海之劇在昌樂縣西北後漢時此劇廢省而移

北海郡治菑川之劇也城之北側有故臺臺西有方池晏謨曰西

去齊城九十七里耿弇破張步於臨淄追至巨昧水上

僵尸相屬即是水也巨洋水又東北逕晉龍驤將軍幽

州刺史辟閭渾墓東而東北流墓側有一墳甚高大時

人咸謂之為馬陵而不知誰之邱壟也巨洋水又東北

逕益縣故城東王莽更之曰滌蕩也一清按今本漢志

史劉盆子傳有王莽探湯侯田況章懷注曰王莽改北海益縣曰探湯是也晏謨曰南去齊

城五十里司馬宣王伐公孫淵北徙豐人住於此城遂

改名為南豐城也又東北積而為潭枝津出焉謂之百

尺溝西北流逕北益都城也漢武帝元朔二年封菑川

懿王子劉胡為侯國一清按史漢表作益都侯而漢志

益侯國故屬北海是也魏書地形志齊郡有益都縣寔

宇記云魏于壽光縣南十里益都城置益都縣屬齊郡

宋至後魏並屬齊郡也則益都是三國魏所置治益都

城與兩漢之益縣微有分別顧景范曰益都侯邑後并

水經注卷二十六



入益縣未知所據矣又青州府壽光縣下云鉅定城在縣西北八十里漢縣屬齊郡後漢省志云縣西四十里有益城漢益縣也縣北二十里有益都城漢武封淄川懿王子胡為侯邑處是知侯邑與縣治本屬二城益都始為侯邑未立又西北流而注于巨淀矣

又東北過壽光縣西

巨洋水自巨淀湖東北流逕縣故城西王莽之翼平亭也漢光武建武二年封更始子鯉為侯國城之西南水東有孔子石室故廟堂也中有孔子像弟子問經既無碑誌未詳所立全氏曰按于欽曰水經之言非也乃是倉頡墓中石室巨洋水又東北流堯水注之水出劇縣南角崩山即故義山也俗人以其山角若崩因名為角崩山亦名為角林山皆世

俗音譌也水即蕤水矣地理志曰劇縣有義山蕤水所出也北逕嶼山東俗亦名之為青水矣堯水又東北逕東西壽光二城間應劭曰壽光縣有灌亭杜預曰在縣東南斟灌國也又言斟亭在平壽縣東南平壽故城在白狼水西今北海郡治水上承營陵縣之下流東北逕城東西入別畫湖亦曰朕懷湖湖東西二十里南北三十里東北入海斟亭在漑水東水出桑犢亭東覆甌山亭故高密郡治世謂之故郡城山謂之塔山水曰鹿孟水亦曰戾孟水皆非也地理志曰桑犢故亭北海之屬縣矣有覆甌山漑水所出一清按漢志北海郡桑犢縣覆甌山漑水所出北至都昌



入海桑犢本漢北逕斟亭西北今曰白狼水按地理志

北海有斟縣京相璠曰故斟尋國禹後西北去灌亭九

十里灑水又北逕寒亭西郡國志曰平壽在斟城東清

按續志云平壽有斟城不如酈所云薛瓚漢書集註云按汲郡古文相居

斟灌東郡灌是也明帝以封周後改曰衛斟尋在河南

非平壽也又云太康居斟尋羿亦居之桀又居之尙書

序曰太康失國兄弟五人獫于洛汭此即太康之居為

近洛也余考瓚所據今河南有尋地衛國有觀土國語

曰啟有五觀謂之姦子五觀蓋其名也所處之邑其名

曰觀皇甫謐曰衛地又云夏相徙帝邱依同姓之諸侯

于斟灌斟尋氏即汲冢書云相居斟灌也既依斟尋明

斟尋非一居矣窮后既仗善射篡相韓泥亦因逢蒙弑

羿即其居以生澆因其室而有豷故春秋襄公四年魏

絳曰澆用師滅斟灌及斟尋氏處澆于過處豷于戈是

以伍員言于吳子曰過澆殺斟灌以伐斟尋是也有夏

之遺臣曰靡事羿羿之死也逃于鬲氏今鬲縣也收斟

灌斟尋二國之餘燼殺韓泥而立少康滅之有窮遂亡

也是蓋寓其居而生其稱宅其業而表其邑縱遺文浴

禰亭郭有傳未可以彼有灌目謂專此為非捨此尋名而

專彼為是以土推傳應氏之據亦可按矣全氏曰按吳仁傑曰原二



對故國蓋不一處應氏以為壽光平壽縣按靡奔有兩  
以收二國餘燼南在平原與北海近則應說是瓚以為  
在河南與洛河近則瓚說亦是然則其歸奈何曰汲冢  
書有之太康居斟尋亦居之太康失邦而奔斟尋斟  
尋本在河南羿伐之乃棄國而保平壽所以有二城不  
然斟尋未滅羿安得而居之相居在東郡之觀而北海  
亦有灌亭正類是而後又以濳于縣為故斟灌國其非  
一地可知乃必欲以畔觀為斟灌至此依違兩可復不  
盡非應說亦因矣 堯水又東北注巨洋伏琛晏謨並言堯嘗頓

駕於此故受名焉非也地理志曰濳水自劇東北至壽  
光入海沿其徑趣即是水也

又東北入于海

巨洋水又東北逕望海臺西東北流伏琛晏謨並以爲  
平望亭在平壽縣故城西北八十里古縣又或言秦始皇

皇升以望海因曰望海臺未詳也按史記漢武帝元朔  
二年封菑川懿王子劉賞為侯國又東北注于海也

淄水出泰山萊蕪縣原山

淄水出縣西南山下世謂之原泉地理志曰原山淄水  
所出故經有原山之論矣淮南子曰水出自飴山蓋山  
別名也東北流逕萊蕪谷屈而西北流逕其縣故城南  
從征記曰城在萊蕪谷當路岨絕兩山間道由南北門  
漢末有范史雲為萊蕪令言萊蕪在齊非魯所得引舊  
說云齊靈公滅萊萊民播流此谷邑落荒蕪故曰萊蕪  
禹貢所謂萊夷也夾谷之會齊侯使萊人以兵劫魯侯



宣尼稱夷不亂華是也余按太無萊柞竝山名也郡縣取目焉漢高祖置左傳曰與之無山及萊柞是也何氏傳昭公七年辭以無山與之萊柞蓋有無之無非山名全氏曰按以蕪為無善長殆有聞于萊蕪之為萊母而不知其應劭十三州記曰太山萊蕪縣魯之萊柞邑淄非山也水又西北轉逕城西又東北流與一水合水出縣東南俗謂之家桑谷水從征記名曰聖水列仙傳曰鹿皮公者淄川人也少為府小史才巧舉手成器山岑上有神象人不能到小史白府君請木工斤斧三十人作轉輪造縣閣意思橫生數十日梯道成上其巔作祠屋畱止其傍其二間以自固食芝草飲神泉七十餘年淄水來

山下呼宗族得六十餘人命上山半水出盡漂一郡沒者萬計小史辭遣家室令下山著鹿皮衣升閣而去後百餘年下賣藥齊市也其水西北流注淄水淄水又北出山謂之萊蕪口東北流者也

又東北過臨淄縣東

淄水自山東北流逕牛山西又東逕臨淄縣故城南東得天齊口水出南郊山下謂之天齊淵五泉竝出南北三百步廣十步山即牛山也左思齊都賦曰牛嶺鎮其南者也水在齊入祠中齊之為名起於此矣地理風俗記曰齊所以為齊者即天齊淵名也其水北流注于



淄水又東逕四豪冢北水南山下有四冢方基員墳咸

高七尺東西直列是田氏四王冢也淄水又東北逕蕩

陰里西水東有冢一基三墳東西八十步是烈士公孫

接田開疆古冶子之墳也一清按晏子作公孫捷樂

子惡其勇而無禮投桃以斃之死葬陽里即此也一清

里亦作陰陽里寰宇記引郡國志云臨淄縣東有陰陽

里是也御覽引此文仍作蕩陰里諸葛亮梁父吟步出

齊東門遙望蕩陰里樂府解題作追淄水又北逕其城

東城臨淄水故曰臨淄王莽之齊陵縣也爾雅曰水出

其前左為營邱一清按爾雅云水出其前淄邱水出其

善長所引疑武王以其地封太公望賜之以四履都營

邱為齊或以為都營陵史記周成王封師尚父于營邱

東就國道宿行遲萊侯與之爭營邱逆旅之人曰吾聞

時難得而易失客寢安殆非就封者也太公聞之夜衣

而行至營邱陵亦邱也獻公自營邱徙臨淄余按營陵

城南無水唯城北有一水世謂之白狼水西出丹山俗

謂凡山也東北流由爾雅出前左之文不得以為營邱

矣營邱者山名也詩所謂子之營兮遭我乎獯之間兮

作者多以邱陵號同緣陵又去萊差近咸言太公所封

考之春秋經書諸侯城緣陵左傳曰遷杞也毛詩鄭注

並無營字瓚以為非近之一清按以營陵為緣陵正是

瓚說而道元顧云瓚以為非



于美城號淄邱邱邱臨世皆營或即太臨註近  
公霸緣而也也邊地附家舊邱日營公淄之則  
之都所而春也云萊一卽卽卽卽卽卽卽卽卽  
邑為之秋秋本故語實班應營邱也營邱也  
矣大之先公夏菜滑氏而邱邱邱邱邱邱邱  
不然率棄地自雍邑猶國太公始封宜在  
東樓之裔既非強大焉能與決決  
是故營陵又有緣陵之目遂為涪  
營陵之裔既非強大焉能與決決  
是故營陵又有緣陵之目遂為涪  
營陵之裔既非強大焉能與決決  
是故營陵又有緣陵之目遂為涪

表海之邦爭此逼處之土乎且瓚所引晏子對景公之  
語亦見韓詩外傳景公游牛山而泣下晏子曰古無死  
對亦見韓詩外傳景公游牛山而泣下晏子曰古無死  
者則太公丁公至今猶存吾君方將披萊豆而立畝  
何暇念死乎又甯可以始徙都薄姑周夷王之據哉又困  
學紀聞云齊世家胡公始徙都薄姑周夷王之據哉又困  
因徙薄姑都治臨淄詩正義曰詩薄姑周夷王之據哉又困  
傳曰古者諸侯逼隘則王者遷其邑而定其居蓋去薄  
姑遷于臨淄以爲宣王之時始遷臨淄與世家異毛公  
在遷之前其言當有據此證尤爲精確顧祖禹曰呂氏  
春秋太公封營邱之渚海阻山高險固之地其後五世  
胡公徙薄姑六世獻公徙臨淄蓋自東而西也又願  
氏曰班志云臨淄名營邱此蓋因臨淄城中有新田而仍謂之  
絳楚遷于都而仍謂之營邱也晉載因臨淄城中有新田而仍謂之  
以舊名非即古營邱也晉載因臨淄城中有新田而仍謂之  
此地杜氏又謂臨淄後爲營陵夫漢志明言齊登邱即  
淄北海郡治營陵豈一城乎此顧氏謂野王杜氏則故  
以營邱爲營陵不知營邱之號可襲而漢縣之今臨淄  
目不可移也若改作臨淄後稱營邱則善矣

水經注卷二十六

水經注卷二十六



城中有邱在小城內周迴三百步高九丈北降丈五淄水出其前故有營邱之名與爾雅相符城對天齊淵故城有齊城之稱是以晏子言始爽鳩氏居之逢伯陵居之太公居之又曰先君太公築營之邱一清按師古曰築營之邱言于營邱地季札觀風聞齊音曰泱泱乎大風也哉表東海者其太公乎田已入齊過淄自鏡郭景純言齊之營邱淄水逕其南及東也非營陵明矣獻公之徙其猶晉氏深翼名絳非謂自營陵而之也全氏曰孔穎達曰臨淄徙臨淄者應劭之繆當云自薄姑徙臨淄一清按史記齊世家云哀公同母弟山怨胡公與其黨率營邱人襲殺胡公而自立是為獻公因徙薄姑都治臨菑即臣瓚所謂博昌有薄姑城者也濟水注云薄姑去齊城六十

里漢志又云琅邪姑幕或曰薄姑闕以為成王封太公非也蓋周公滅奄之後以薄姑地益太公之封耳其外郭即獻公所徙臨淄城也世謂之虜城言齊湣王伐燕燕王噲死虜其民寶居郭因以名之秦始皇二十六年滅齊為郡治臨淄漢高帝六年封子肥于齊為王國王莽更名濟南也戰國策田單為齊相過淄水有老人涉淄而出不能行坐沙中單乃解裘於斯水之上也

又東過利縣東

淄水自縣東北流逕東安平城北

禹貢錐指曰應劭曰博昌縣西南三十里

有安平亭故縣也按淄水自利縣東又安平故城若以為是則博昌之西南今臨淄縣東又有安平故城若以為是則當先安平後利縣豈注文偶爾失次耶不然則道元誤引利縣東北當別有東安平城也一清按漢志淄川國

水

經注釋

淄水

蓋



東安平縣師古注引闕駟曰博陵有安平故此加東然則非博昌也所引應劭語見濟水注安平又是平安之誤博陵後漢質帝置方輿紀要安平城在臨淄縣東十七里本齊邑史記齊世家平公割齊安平以東為田氏封邑潛王末燕師入齊田單走安平既而齊襄王封田單為安平君漢置東安平縣屬淄川國後漢改屬北海國安平平安本是二邑皆在利縣西南東安平為淄水所逕平安為濟水所逕不可混也此文自縣東北流蒙上臨淄而言故以東安平次于其下觀後別出時水東北逕齊利縣故城北之語可知原無舛誤胡氏乃妄辯之

又東逕巨淀縣故城南征和四年漢武帝幸東萊臨大海三月耕巨淀即此也縣東南則巨淀湖蓋以水受名也淄水又東北逕廣饒縣故城南漢武帝元鼎中封淄川靖王子劉國為侯國一清按王子侯表是元鼎元年封淄水又東北馬車瀆水注之首受巨淀淀即濁水所注也呂忱曰

濁水一名澗水出廣縣為山世謂之治嶺山東北流逕廣固城西城在廣縣西北四里四周絕澗岨水深隍晉永嘉中東萊人曹嶷所造也水側山際有五龍口義熙五年劉武帝伐慕容超于廣固也以藉嶮難攻兵力勞弊河間人元文說裕云昔趙攻曹嶷望氣者以為繩水帶城非可攻拔若塞五龍口城當必陷石虎從之嶷請降降後五日大雨雷電震開後慕容恪之攻段龕十旬不拔塞口而龕降降後無幾又震開之舊基猶存宜試修築裕塞之超及城內男女皆悉腳弱病者大半超遂出奔為晉所擒也然城之所跨實憑地嶮其水可固城



者在此濁水東北流逕堯山東從征記曰廣固城北三  
里有堯山祠堯因巡狩登此山後人遂以名山廟在山  
之左麓廟像東面華宇修整帝圖嚴飾軒冕之容穆然  
山之上頂舊有上祠今也毀廢無復遺式磐石上尙有  
人馬之跡徒黃石而已唯刀劍之蹤逼真矣至于燕鋒  
代鏑魏鉞齊鉞與今劍莫殊以蜜模寫知人功所制矣  
西望胡公陵孫暢之所云青州刺史傅宏仁言得銅  
棺隸書處濁水又東北流逕東陽城北東北流合長沙  
水水出逢山北阜世謂之陽水也東北流逕廣縣故城  
西舊青州刺史治亦曰青州城陽水又東北流石井水

注之水出南山山頂洞開望若門焉俗謂是山爲劈頭  
山其水北流注井井際廣城東側三面積石高深一匹  
有餘長津激浪瀑布而下澎聳之音驚川聒谷湍濟之  
勢狀同洪河北流入陽水余生長東齊極遊其下於中  
闊絕乃積絲載後因王事復出海岱郭金紫惠同石井  
賦詩言意彌日嬉娛尤慰羈心但恨此水時有通塞耳  
陽水東逕故七級寺禪房南水北則長廡徧駕迴閣承  
阿林之際則繩坐疎班錫鉢間設所謂修修釋子眇眇  
禪棲者也陽水又東逕東陽城東南義熙中晉青州刺  
史羊穆之築此以在陽水之陽卽謂之東陽城世以濁



水為西陽水故也水流亦有時窮通信為靈矣昔在宋世是水絕而復流劉晃賦通津焉魏太和中此水復竭輟流積年先公除州即任未甚是水復通澄映盈川所謂幽谷枯而更溢窮泉輟而復流矣海岱之士又頌通津焉平昌龍民孫道相頌曰唯彼繩泉竭踰三齡祈盡珪璧謁窮斯牲道從隆替降由聖明羣民河間趙嶷頌云敷化未朞元澤潛施枯源揚濶涸川滌陂北海郭欽曰先政輟津我后通洋但頌廣文煩難以具載陽水又北屈逕漢城陽景王劉章廟東東注于巨洋後人竭斷令北注濁水時人通謂濁水為陽水故有南陽北陽水

之論二水渾流世謂之為長沙水也亦或通名之為繩水故晏謨伏琛為齊記竝云東陽城既在繩水之陽宜為繩陽城非也世又謂陽水為洋水余按羣書盛言洋水出臨朐縣而陽水導源廣縣兩縣雖鄰川土不同於事疑焉于氏欽齊乘云曾肇南洋橋記曰俗呼洋水有二里者是也北洋傳記無文今出九回山入淄水齊記謂之繩水道元則曰羣書盛言洋水出臨朐陽水道源廣縣兩縣雖鄰川土不同于事疑焉然則洋分南北當後魏時已不能知况後世哉今辯之曰羣書盛言出臨朐者此巨洋也漢志失其原委耳南陽自為長沙水北陽自為濁水導源廣縣者是也曾氏乃因漢志石膏山之洋水而以陽為洋誤矣長沙水出其西石溝水出其東洋水自出臨朐沂山漢志讀如祥與蜀之洋州同音故水經稱洋水則有巨洋北洋稱陽水則有南陽北陽四水雖以音同致疑源流可考惜乎曾氏之不察也

水經注卷二十六



濁水又北逕臧氏臺西又北逕益城西又北流注巨淀  
地理志曰廣縣爲山濁水所出東北至廣饒入巨淀巨  
淀之右又有女水注之水出東安平縣之菟頭山從征  
記曰水西有桓公冢甚高大墓方七十餘丈高四丈員  
墳圍二十餘丈高七丈餘一墓方七丈二墳晏謨曰依  
陵記非葬禮如承世故與其母同墓而異墳伏琛所  
不詳也冢東山下女水原有桓公祠侍其衡奏魏武王  
所立曰近日路次齊郊瞻望桓公墳壟在南山之阿請  
爲立祠爲塊然之主郭緣生述征記曰齊桓公冢在齊  
城南二十里因山爲墳大冢東有女水或云齊桓公女

冢在其上故以名水也女水導川東北流甚有神焉化  
隆則水生政薄則津竭燕建平六年水忽暴竭元明惡  
之寢病而亡燕太上四年女水又竭慕容超惡之燕祚  
遂淪女水東北流逕東安平縣故城南續述征記曰女  
水至安平城南伏流一十五里然後更流注北陽水城  
故鄆亭也春秋魯莊公三年紀季以鄆入齊公羊傳曰  
季者何紀侯弟也賢其服罪請鄆以奉五祀田成子單  
之故邑也後以爲縣博陵有安平故此加東也世祖建  
武七年封菑川王子劉茂爲侯國一清按范史宗室四  
王傳泗水王欸欸之  
子曰菑川王終欽從父弟曰中山王茂建武十三年宗  
室諸王降爵茂封穰侯是茂子菑川王爲從父亦不封



東安平也然光武紀又云以茂為單父侯又逕東安平道元載之泗水注中紀傳互異未知所是又逕東安平城東東北逕壘邱東東北入巨淀地理志曰菟頭山女水所出東北至臨淄入巨淀又北為馬車瀆北合淄水又北時繩之水注之時水出齊城西北二十五里平地出泉即如水也亦謂之源水因水色黑俗又目之為黑水西北逕黃山東又北歷愚山山東有愚公冢時水又屈而逕杜山北有愚公谷齊桓公時公隱于谷鄰有認其駒者公以與之山即杜山之通阜以其人狀愚故謂之愚公山水有石梁亦謂之為石梁水又有澧水注之水出時水東去臨淄城十八里所謂澧中也俗以澧水

為宿留水西北入于時水孟子去齊三宿而後出晝故

世以此而變水名也一清按史記惠景間侯者年表澧

水名在齊又音乎卦反後漢書耿弇傳云進軍晝中章懷注云晝中邑名晝音胡麥反故城在今西安城東有

晝水故名或作晝則字形之似也蓋以孟子三宿于此後人因以宿留目之方俗之音隨之而變酈道元遊歷

三齊熟其風土故云俗以澧水為宿留水蓋宿留反語宜為晝字朱子集註曰或曰晝當作晝是也其後悉改

而從澧王應麟困學紀聞引水經注云澧水出時水及黃慎中刊本俱是澧字失古義矣乃毛奇齡作經問必

欲強分晝晝為二邑云晝邑在臨淄西南為孟子所宿之處晝邑在臨淄西北三十里燕封王歇之地以燕從

西北至齊當是晝邑孟子從西南至滕當是晝邑妄生穿鑿故不若酈注之為當也水南山西有

王歇墓昔樂毅伐齊賢而封之歇不受自縊而死水側

有田引水溉跡尚存時水又西北逕西安縣故城南本



渠邱也齊大夫離廩之邑矣王莽更之曰東甯時水又  
西至石洋堰分爲二水謂之石洋口枝津西北至梁鄒  
入沛時水又北逕西安城西又北京水系水注之水出  
齊城西南世謂之寒泉也東北流直申門西京相璠杜  
預並言申門卽齊城南面西第一門矣爲申池昔齊懿  
公遊申池邴戎庸職朱氏謀璋箋云左傳作邴歆閭職二人害公於竹  
中今池無復髣髴然水側尙有小小竹木以時遺生也  
左思齊都賦注申池在海濱齊藪也余按春秋襄公十  
八年晉伐齊戊戌伐雍門之菽己亥焚雍門壬寅焚東  
北二郭甲辰東侵及沂而不言北掠于海且晉獻子尙

不辭死以逞志何容對仇敵而不懲暴草木于海隅乎  
又炎夏火流非遠遊之辰懿公見弑蓋是白龍魚遯見  
困近郊矣左氏捨近遺遠考古非議杜預之言有推據  
耳系水傍城北流逕陽門西水次有故封處所謂齊之  
稷下也當戰國之時以齊宣王喜文學遊說之士鄒衍  
涓于髡田駢接子慎到之徒七十六人皆賜列第爲上  
大夫不治而論議是以齊稷下學士復盛且數百十人  
劉向別錄以稷爲齊城門名也談說之士期會于稷門  
下故曰稷下也鄭志曰張逸問書贊云我先師棘下生  
何時人鄭元答云齊田氏時善學者所會處也齊人號



之棘下生無常人也余按左傳昭公二十二年莒子如齊盟于稷門之外漢以叔孫通爲博士號稷嗣君史記音義曰欲以繼蹤齊稷下之風矣然棘下又是魯城內地名左傳定公八年陽虎劫公伐孟氏入自上東門戰于南門之內又戰于棘下者也蓋亦儒者之所萃焉故張逸疑而發問鄭元釋而辯之雖異名兩見大歸一也一清按寰宇記棘下齊城內地名棘稷聲相近不得引魯地以釋齊城內有故臺有營邱有故景王祠卽朱虛侯章廟矣晉起居注云齊有大蛇長三百步負小蛇長百餘步逕於市中市人悉觀自北門所入處也北門外東北二百步有齊相晏嬰冢宅左

傳晏子之宅近市景公欲易之而嬰弗更爲誠曰吾生則近市死豈易志乃葬故宅後人名之曰清節里系水又北逕臨淄城西門北而西流逕梧宮南昔楚使聘齊齊王饗之梧宮卽是宮矣其地猶名梧臺里臺甚層秀東西一百餘步南北如減卽古梧宮之臺臺東卽闕子所謂宋愚人得燕石處臺西有石社碑碑猶存漢靈帝熹平五年立其題云梧臺里系水又西逕葵邱北春秋莊公八年襄公使連稱管至父戍葵邱京相璠曰齊西五十里有葵邱地若是無戍之一清按下有脫字僖公九年齊桓會諸侯于葵邱宰孔曰齊侯不務德而勤遠略明葵



邱不在齊也引胡廣汾陰葵邱山陽西北葵城宜在此  
非也余原左傳連稱管至父之戎葵邱以瓜時為往還  
之期請代弗許將為齊亂故令無寵之妹候公於宮因  
無知之緇遂害襄公若出遠無代甯得謀及婦人而為  
公室之亂乎是以杜預稽春秋之旨即傳安之注于臨  
淄西不得捨近託遠苟成已異於異可殊即義為負然  
則葵邱之戎即此地也系水西左迤為潭又西逕高陽  
僑郡南魏所立也又西北流注于時時水又東北流繩  
水注之水出營城東世謂之漢漆水也西北流逕營城  
北漢景帝四年封齊悼惠王子劉信都為侯國一清按

王子侯

表是文帝四年封繩水又西逕樂安博昌縣故城南應劭曰昌

水出東萊昌陽縣道遠不至取其嘉名一清按漢志注

出東萊昌陽臣瓚曰從東萊至博昌經歷宿水不得至也取其嘉名耳師古曰瓚說是今注云云殆合二人之說為一人而昌陽之昌水經失去東萊一郡之水故無可考耳闕駟曰縣處勢平故

曰博昌繩水西歷貝邱京相璠曰博昌縣南近繩水有地名貝邱在齊城西北四十里春秋莊公八年齊侯田于貝邱見公子彭生豕立而泣齊侯墜車傷足於是處也繩水又西北入時水從征記又曰水出臨淄縣北逕

樂安博昌南界西入時水者也自下通謂之為繩也昔晉侯與齊侯宴齊侯曰有酒如繩指喻此水也時水又



屈而東北逕博昌城北一清按漢志千乘郡博昌時水北至巨定入馬車瀆俗本作縣

字誤也時水又東北逕齊利縣故城北又東北逕巨淀縣

故城北又東北逕廣饒縣故城北東北入淄水地理風

俗記曰淄入濡全氏曰先司空公曰東州無濡水古文濡如通漢志如溪水經作濡溪是也然

則所云濡即形水一名如故也然淄水淮南子曰白公

問微言曰若以水投水如何孔子曰淄繩之水合易牙

嘗而知之謂斯水矣

又東北入于海

淄水入馬車瀆亂流東北逕琅槐故城南又東北逕馬井城北與時繩之水互受通稱故邑流其號又東北至

皮邱坑入於海故晏謨伏琛並言淄繩之水合于皮邱

坑西地理志曰馬車瀆至琅槐入于海也蓋舉縣言也

齊乘云按通志略曰杜預謂淄入汶班固謂淄入濟桑欽謂淄入海考其形勢當以杜為正豈其然乎諸說惟

桑氏為有據宜其以水名家也蔣氏廷錫尙書地理今釋曰禹時淄水入海不入濟水經注敘述甚明史記河

渠書亦云禹治水之後于齊通蓄濟之間是二水不通可知蔡氏因漢書淄水入海一語云淄水東入海非是

王氏士禎居易錄云鄭夾深閩人于西北地理水道多不能詳即就予鄉之水考之淄水出秦山梁父縣

西入汶班云出萊蕪原山東至博昌入海桑欽云出萊蕪原山東北入海漁仲云考其形勢當以杜言為正按

淄水出益都縣顏神鎮東南岳陽山東麓即原山也北逕馬陵俗名長谷道東北逕牛山折而北漸臨淄城東

又東北逕安平故城北又東北逕樂安城東又北至馬車瀆合時水入海今淄水流經臨淄城南十里沙石迅

急東北至樂安境與時水同入海與汶判若秦越安得有西入汶之理以此推之通志之舛說多矣一清按淄



汶水 汶水 汶水 汶水

水入海于氏主水經最合禹迹蔡氏主班猶未為失鄭氏主杜則誤矣然杜元凱所言別一淄水原非禹貢之淄也夾深不知而妄主之王氏不察而強辨之班云入濟即應劭所云入濡也是支流非正派地理志于泰山萊蕪之淄水千乘博昌之時水皆云幽州浸青之北境即幽之南境蓋本于職方也合之瓠河經及濟水注引伏琛齊記與本篇注淄時二水原有相通之道而以入海為歸漢志水經本無異同也

**汶水出朱虛縣泰山** 一清按沂山在青州府臨胸縣南百

沂山一名東泰山史記封禪書公玉帶言黃帝封東泰山禪凡山天子既合設祠具至東泰山山卑小不稱其費乃令禮官祠之而不封禪隋開皇十四年詔以沂山為東鎮後代因之載在祀典志云山西宗岱嶽東俯琅邪背負鳳皇嶺東接穆陵關其巔為百丈崖壁立萬仞形如斧削有飛泉下灑曰瀑布泉瀾水出其西麓水經巨洋水出朱虛縣泰山鄭注云泰山即東小泰山也沂水亦出其西水經沂水出泰山蓋縣艾山鄭注云鄭元云沂山亦或云臨沂山是也流水出其東水經流元出沂山亦或云臨沂注云大弁山與小泰山連麓而異名是也而入濰之汶

亦出其下蓋齊東境內之水大半出于表青州之鎮也宜哉

山上有長城西接岱山東連瑯琊巨海千有餘里蓋田氏之所造也竹書紀年梁惠成王二十年齊築防以為長城竹書又云晉烈公十二年王命韓景子趙烈子及我師伐齊入長城史記所謂齊威王曰趙侵我伐長城者也伏琛晏謨並言水出縣東南崕山山在小泰山東者也

**北過其縣東**

**汶水自縣東北逕郚城北**地理風俗記曰朱虛縣東四十里有郚城亭故縣也又東北逕管甯冢東故晏謨言



柴阜西南有魏獨行君子管甯墓墓前有碑又東北逕柴阜山北山之東有徵士邴原冢碑誌存焉汶水又東北逕漢青州刺史孫嵩墓西有碑碣汶水又東逕安邱縣故城北漢高帝八年封將軍張說為侯國地理志曰王莽之誅邴也孟康曰今渠邱亭莒渠邱城是也伏琛晏謨齊記並言亭在渠邱城東北十里非也城對牟山之西南有孫賓碩兄弟墓碑誌並在也

又北過濇于縣西又東北入于維

故夏后氏之斟灌國也周武王以封濇于公號曰濇于國春秋桓公五年冬州公如曹傳曰濇于公如曹度其

國危遂不復也其城東北則兩川交會也

一清按漢志琅邪郡朱虛

縣東泰山汶水所出東至安邱入維師古曰前言汶水出萊蕪入濟今此又言出朱虛入維將桑欽所說有異或者有二汶水乎曾彥和曰汶水有二出萊蕪原山入濟者徐州之汶也出朱虛縣泰山入維者青州之汶也于欽曰按入濟之汶見禹貢論語謂之汶上書傳謂之北汶即今大清河入濇之汶見漢書入沂之汶見水經齊有三汶清河為大胡渭曰元和志乾封縣界有五汶源別而流同五汶者曰北汶贏汶柴汶牟汶其一則經流也酈注無贏汶流合牟汶故不言五汶又有水出萊蕪縣寨子村流合牟汶者近志指為濇汶據漢志琅邪靈門縣有高泉山濇水所出東北入濇說文云水出靈門山世謂之濇汶在今莒州界與萊蕪無涉東汶出朱虛縣小泰山北流至濇于縣入濇在今臨朐安邱界淮南子曰汶出弗其西流入濟高誘云弗其山名在朱虛縣東是即入濇之東汶言入濟者淮南之誤也

濇水出琅邪箕縣濇山

日知錄曰濇水出琅邪箕屋山尚書禹貢濇淄其道左傳襄公十八

水經注釋卷二十六

集



乃糾注采  
或從心作惟總是一字漢書地理志瑯邪郡朱虛下箕下  
作維靈門下橫下析泉下作淮上文引禹貢維其道又  
鳥佳之佳則一爾後人誤讀為淮沂  
其父之淮而呼此水為槐河失之矣

瑯邪山名也越王句踐之故國也句踐并吳欲霸中國  
徙都瑯邪秦始皇二十六年滅齊以為郡城即秦皇之  
所築也遂登瑯邪大樂之山作層臺於其上謂之瑯邪  
臺臺在城東南十里孤立特顯出于眾山上下周二十  
里餘傍濱巨海秦皇樂之因畱三月乃徙黔首三萬戶  
於瑯邪山下復十二年所作臺基三層層高三丈上級  
平敞方二百餘步廣五里刊石立碑紀秦功德臺上有

神淵淵至靈焉人汗之則竭齋潔則通神廟在齊八祠

中漢武帝亦嘗登之漢高帝呂后七年以為王國文帝

三年更名為郡全氏曰于文當作漢高后七年以封營

合王莽改曰填夷矣淮水導源濰山許慎呂忱云濰水

出箕屋山淮南子曰濰水出覆舟山蓋廣異名也東北

逕箕縣故城西又西析泉水注之水出析泉縣北松山

東南流逕析泉縣東又東南逕仲固山東北流入于濰

地理志曰至箕縣北入濰者也一清按漢志瑯邪郡析

淮濰即濰濰出箕縣濰山莫字是箕字之誤寰宇記引  
漢志亦作莫云舊地理書並失其所蓋今莒縣東北  
分流山之北又云漢志注云夜頭水經神南至海輿地  
志云向水南至海夜頭向水蓋異名也地理書皆失其



所在今莒縣南七十里故向城春秋時向邑即禪縣也  
禪今本漢書作禪說文作禪應劭曰音禪與析泉境相  
屬樂史所記足  
補酈注之遺  
澠水又東北逕諸縣故城西春秋文公

十二年季孫行父城諸及鄆傳曰城其下邑也王莽更  
名諸并矣澠水又東北涓水注之水出馬耳山山高百  
丈上有二石並舉望齊馬耳故世取名焉東去常山三  
十里涓水發于其陰北逕婁鄉城東春秋昭公五年經  
書夏莒牟夷以牟婁防茲來奔者也又分諸縣之東為  
海曲縣故俗人謂此城為東諸城涓水又北注于澠水  
東北過東武縣西

縣因岡為城城周三十里漢高帝六年封郭蒙為侯國

王莽更名之曰祥善矣又北左合扶淇之水水出西南

常山東北流注澠晏謨伏琛並以澠水為扶淇之水以

扶淇之水為澠水非也按經脈志澠自箕縣北逕東武

縣西北流合扶淇之水晏謨伏琛云東武城西北二里

澠水者即扶淇之水也澠水又北右合盧水即久台水

也地理志曰水出瑯邪橫縣故山一清按漢志瑯邪橫

所出東南至東武入淮師古曰台音怡所謂橫故山者  
山本名橫山縣因山以受氏亦曰橫耳道元依班志以  
立文乃曰橫縣故山可謂疎幽矣顧景范曰久當作名  
漢書誤本後人承其繆又曰盧水源出盧山北流入澠  
一名台水近志訛為久台水又曰盧山在諸城縣東南  
四十五里以秦博士盧敖隱處而名其北即廢橫縣也  
盧水源出于此按周禮職方兗州其浸盧維班固僅志  
禹貢澠水而盧水無聞師古以為在濟北盧縣而泰山



之盧又無盧水也故老友全謝山欲以城陽盧縣之盧川水當之竊謂不如用此瑯邪之台水本出盧山曰盧水東南至東武入濰見于地理志以此當職方之浸庶為可據也王莽之令邱也山在

東武縣故城東南世謂之盧山也西北流逕昌縣故城

西東北流齊地記曰東武城東南有盧水水側有勝火

木方俗音曰檉子其木經野火燒死炭不滅故東方朔

云不灰之木者也其水又東北流逕東武縣故城東而

西北入濰地理志曰久台水出東南逕東武入濰者也

尚書所謂濰淄其道矣

又北過平昌縣東

濰水又北逕石泉縣故城西王莽之養信也地理風俗

記曰平昌縣東南四十里有石泉亭故縣也濰水又北

逕平昌縣故城東荆水注之水出縣南荆山阜東北流

逕平昌縣故城東漢文帝封齊悼惠王肥子劉永為侯

國也一清按永史漢表俱作邛是也即後立為膠西王者

邪俱有平昌縣平原之平昌下云侯國而瑯邪之平昌

則無說續志北海國平昌下云侯國故屬瑯邪然則小

司馬城之東南角有臺臺下有井與荆水通物墜於井

則取之荆水昔常有龍出入于其中故世亦謂之龍臺

城也荆水又東北流注于濰水又北涪水注之水出崑

山世謂之巨平山也地理志曰靈門縣有高桑山與崑

一山涪水所出東北入濰一清按漢志瑯邪郡靈門縣



入淮師古曰今是山西接崞山許慎說文言水出靈門  
泉即柘字 山一清按說文涪水出瑯邪靈門 世謂之涪汶矣其水  
壺山注云靈門山疑脫壺字 東北逕姑幕縣故城東縣有五色土王者封建諸侯隨  
 方受之故薄姑氏之國也闕駟曰周成王時薄姑與四國  
 作亂周公滅之以封太公是以地理志曰或言薄姑也  
 王莽曰季陸矣應劭曰左傳曰薄姑氏國太公封焉薛  
 瓚漢書注云博昌有薄姑城未知孰是涪水又東北逕  
 平昌縣故城北古竭此水以溢溉田南注荆水涪水又  
 東北流而注于濰水也  
 又北過高密縣西

應劭曰縣有密水故有高密之名也然今世所謂百尺  
 水者蓋密水也水有二源西源出突山亦曰障曰山山  
 勢高峻隔絕陽曦即此山也晏謨曰山狀障日是有此  
 名伏琛曰山上障日故名障日山也其水東北流東源出  
 五弩山西北流同瀉一壑俗謂之百尺水古人竭以溉  
 田數十頃北流逕高密縣西下注濰水自下亦兼通稱  
 焉亂流歷縣西碑產山西又東北水有故堰舊鑿石豎  
 柱斷濰水廣六十許步掘東岸激通長渠東北逕高密  
 縣故城南明帝永平中封鄧震為侯國縣南十里蓄以  
 為塘方二十餘里古所謂高密之南都也溉田一頃許



水經注釋卷二十六 水 三

陂水散流下注夷安澤澠水自堰北逕高密縣故城西

漢文帝十六年別為膠西國宣帝本始元年更為高密

國王莽之章牟也一清按漢志王莽改高密國之高密縣為章牟而國下無說澠水

又北昔韓信與楚將龍且夾澠水而陣于此信夜令為

萬餘囊盛沙以過澠水引軍擊且偽退且追北信決水

水大至且軍半不得渡遂斬龍且於是水水西有礪阜

阜上有漢司農卿鄭康成冢石碑猶存又北逕昌安縣

故城東漢明帝永平中封鄧襲為侯國也郡國志曰漢

安帝延光元年復也

又北過瀆于縣東

澠水又北左會汶水北逕平城亭西又東北逕密鄉亭

西郡國志曰瀆于縣有密鄉地理志皆北海之屬縣也

應劭曰瀆于縣東北六十里有平城亭又四十里有密鄉

亭故縣也澠水又東北逕下密縣故城西城東有密阜

地理志曰有三戶山祠余按應劭曰密者水名是有下

密之稱俗以名阜非也

又東北過都昌縣東

澠水東北逕蓬萊墓萌縣人也少有大節恥給事縣亭

遂浮海至遼東復還在不其山隱學明帝安車徵萌以

佯狂免又北逕都昌縣故城東漢高帝六年封朱軫為

水經注釋卷二十六 三



侯國北海相孔融為黃巾賊管亥所圍於都昌也太史慈為融求救劉備持的突圍其處也

又東北入于海

膠水出黔陬縣膠山北過其縣西

齊記曰膠水出五弩山蓋膠山之殊名也北逕祝茲縣

故城東漢武帝元鼎中封膠東康王子延年為侯國清

按索隱曰案志松茲在盧江亦作祝茲表在瑯邪地理志瑯邪無祝茲縣然小司馬欲以盧江之域當膠東之

封非矣漢表是元封此云元鼎道元誤記也又逕却縣故城西地理志瑯邪

之屬縣也漢文帝元年封呂平為侯國一清按史記高后紀及惠景間

侯者年表呂平以高后元年封扶柳侯非文帝索隱曰縣名屬信都亦非瑯邪却縣也又平為高后姊長姁子

而亦冒姓呂氏者也膠水又北逕黔陬縣故城西袁山松郡國志

曰縣有介亭地理志曰故介國也春秋僖公二十九年

介葛盧來朝聞牛鳴曰是生三犧皆用之間之果然晏

謨伏琛並云縣有東西二城相去四十里有膠水非也

斯乃柜艾水也水出縣西南柜艾山即齊記所謂黔艾

山也東北流逕柜縣故城西王莽之祓同也世謂之王

城又謂是水為洋洋水矣顧氏祖禹曰蘇林以為根艾水即膠之洋河又東

北逕晏伏所謂西黔陬城西又東入海地理志曰瑯邪

有柜縣柜艾水出焉一清按今本漢志作根艾水東入海即斯水也

膠水北逕晏伏所謂西黔陬城東今高密郡側有黔陬



縣地理志曰膠水出邦縣王莽更之純德矣疑卽是縣所未詳也

又北過夷安縣東

縣故王莽更名之原亭也應劭曰故萊夷維邑也太史公曰晏平仲萊之夷維之人也漢明帝永平中封鄧珍為侯國西去濰水四十里膠水又北逕膠陽縣東晏伏並謂之東亭自亭結路南通夷安地理風俗記曰濇于縣東南五十里有膠陽亭故縣也又東北流左會一水世謂之張奴水水發夷安縣東南阜下西北流歷膠陽縣注于膠水之左東北為澤水渚百許里謂之夷安潭

潭之澤周四十里亦濰水枝津之所注也膠水又東北

逕下密縣故城東又東北逕膠東縣故城西漢高帝元

年別為國全氏曰按此實項王事也蓋分三齊而以故王田市國于膠東景帝封子寄

為王國王莽更之郁秩也今長廣郡治伏琛晏謨言膠

水東北迴達于膠東城北百里流注于海

又北過當利縣西北入于海

縣故王莽更名之東萊亭也又北逕平度縣漢武帝元

朔二年封菑川懿王子劉衍為侯國一清按漢表作王行此從史表

莽更名之曰利盧也縣有土山膠水北歷土山注于海

海南土山以北悉鹽坑相承修煮不輟北眺巨海杳冥



無極天際兩分白黑方別所謂溟海者也故地理志曰

膠水北至平度入海者也一清按周禮職方九藪具載

長廣縣有萊山萊王祠養澤在漢昌陽縣故長廣

幽州藪寰宇記云萊州萊陽縣本漢昌陽縣故長廣

城在縣東五十里有萊王祠養澤在漢昌陽縣故長廣

九頃深不可測今泗州錄異記萊陽縣東北有蘆塘方八

古曰鎮日醫無閭漢志遼東郡無慮縣應劭曰音閭師

漢志東萊郡無慮縣今在廣甯城西五里也丹水出丹

水東北入海聲洋水寰宇記謂之清陽水側近與海畔

之眾山對方輿紀要云寰宇記謂之清陽水側近與海畔

山縣東十里北注于海聲清音相近日黃縣有萊山松林

萊君祠臨胸縣有海水祠師古曰齊郡已有臨胸而東

十里去海神祠約五六里曲成縣參山萬里沙陽邱山

以得水所出南入海說文云治水出東萊曲成陽邱山南

水經注卷二十六

海不云至沂也此水但當于膠濰之間入海不應問關

二千里歷濟淮二瀆至沂入海自續志晉魏史志及李

氏元大樂氏太平王氏元豐諸志又皆無曲成治水之

目則大可疑者竊謂出陽邱山者非治水也乃沽水也

左氏傳姑九以西北元凱曰姑大水也九沽水也

魏書地形志東萊郡長廣縣有沽水寰宇記云沽九即

齊界然則漢志所云南至沂者亦非沂也乃計斤之脫

誤耳漢之曲成在今掖縣小沽水出焉其東則黃縣大

沽水出焉逕福山而招遠而萊陽至于平度即墨之問

而合流三百餘里自東而南直趨膠州之麻灣口明世

議海運口者道也故其時嘗有議東引沽河者其入

海之處正漢計斤縣地東萊之水未有大于沽河者亦

未治古于沽河者次之則清陽水耳漢志說文皆誤以

治介國也計斤故分疏之如此後徙莒有鹽官師古曰

春秋左氏傳所謂介根也語有輕重東漢廢介根入

根杜預曰縣東北計基城號介國計基即計斤也又葛



水經注釋卷二十六終  
盧有尤涉亭即姑尤之水入海之處全氏以漢志沂爲  
計斤鑿然可據嶷縣有百支萊王祠昌陽應劭曰昌水  
出師古注引此文于千乘郡博昌縣下不夜縣有成山  
日祠師古曰齊地記云古有日夜出見于東萊故萊立  
此城以不夜爲名是皆表表著名卷中一不  
及之似脫去東萊一郡之水而不可考矣

水經注釋卷二十六終

海甯錢保塘覆校  
華陽吳祖椿



九